

Kukwe Mikani Tuare Juanye

Apocalipsis

Ni ja töitikaka Jesube kädian nämane Juan kākwe tārā ne tikani. Niarakwe tārā mda mda tikani arato abko krörö: Kukwe Kuin Jesubtä Tikani Juankwe, 1 Juan, 2 Juan, 3 Juan. Juan nämane kitani ngite kã butu kädianta Patmos ye kãnti angwane, niarakwe tārā ne tikani.

Jesu ara jire kākwe tārā ne tikamna Juanye. Nita jändrän tuen ño köböre, ye kwrere jire kukwe jökrä tä tikani tārā nebtä abko Jesukristo kākwe mikani tuare Juanye, amne kukwe jökrä niebare Ngöbökwe Juanye abko Juankwe kukwei nuani köböre, ye abko Jesukristo kākwe tikamna tāräre ie. Käne abko, Jesukristo kākwe ja mikani tuare köböre Juanye angwane, Jesukwe kukwe tikamna täräbtä biandre nitre gätäkã Jesu kãbti nünanka juta keta kükü kãnti kã Asiate.

Mdakäre abko, Satana tä rüre käre Ngöbö rüere, ye abko rakadrekä ño ño Juan näire mentokwäre abko Juankwe tikani täräbtä Ngöbö amne Ngöbö Odei Jesukristo kākwe Satana btä sribikä kwekwe ganaindi kwäräbe rükadre gare metre nitre tödekaka Jesubti yeye abkokäre.

Kukwe kãne

1 1 Kukwe mden mden raka-dikã bã jötrö abko rabadre gare nie abko Ngöbökwe mikani Jesukristo kisete mikakäre gare sribikä kwekwe ie. Akwa kukwe ye rabadre gare, abkokäre Jesukristo kākwe angele kwe juani niere ti Juan sribikä kwe neye. **2** Ye abko, tikwe dre dre tuaba Ngöbö kukweibtä amne Jesukristo kākwe kukwe mikani tuare ño ño tie abko tita niere metre jökrä arato. **3** Kukwe biani Ngöbökwe ni Ngöbö kukwei niekã neye, nebtä nire nire kākwe ñäkadre amne nire nire kākwe kukwe nuadre amne mikadre

täte kwe, ni yebtä abko kã rabadi nuäre kri amne Ngöbökwe ja di biandi ie, ñobtä ñan angwane kukweta tikani tārā nebtä kebera nankenã.

4-5 Nitre gätäkã Jesu kãbti kã keta kükü te kã Asiate, krä-ke ti Juan tä köbö kuin juen krörö: Ngöbö tä nire amne Ngöbö nämanena nire amne arabe jatadi, erere arato üai ni kükü tä kürä gobrãnkä Ngöbökwe ye ngwäreki, erere arato Jesukristo kãta kukwe niere era metre Ngöböbtä amne niara aibe nükaninta nire kãne amne niara tä gobrane jrei jökrä kã nebtä bti ta—niaratre kākwe ja moto mika kuin munkrä amne mun

mika nüne jãme kwetre, ie ti tö.

Jesukristo kãta ni tarere amne ja däre ianinte krusobtä kwe angwane, ni tikaninte kwe, ni nämane ngite Ngöbö rüere ye ngäniene. **6** Niarata gobrane nibtä. Erere arato, niarakwe ni mikani blitaka Ngöböbe ni mda mda diäre sribikäre Ngöbö niara Rün kräke, aiseite iKristo raba kãikitaninkä käre käre amne niara di raba kri käre käre! Amen.

7 Olo ketete munkwe.

Kristo jatadita mütabti, ye ni jökrä kākwe tuadi.

Nitre kākwe niara däkäninte bukobti, ye ara jire kākwe tuadita arato.

Ye ngwane ni kã jökrãbti temen rabadi nekwetekã ja jiebti, kã rabadi ja müaire. Abko kore se. Amen.

8 Ni Dänkien Ngöbö kãta niere krörö: Ti abko tārā okwã kena kädianta alfa amne tārā okwã mrã kädianta omega.^a Ti nämana jändrän jökrä kãnenkri kena amne ti rabadi jändrän jökrä täbti mrã. Ti abko Ngöbö Di Kri Jändrän Jökrä Nuenkrã kãta niere.

Ni bã Ni Kã Nebtä Ngobo kwrere abko Juankwe tuani

9 Ti abko Juan. Jesu kãbti ti ne mun mrãkã munkwe amne, munta ja tare nike tödekabtä


Jesubti, ye kwrere tita ja tare nike arato. Erere arato, Ngöböta gobrane munbti, ye kwrere tä gobrane tibti arato amne, munta nünenkã dite jabtä tödekakäre janknu Jesubti, ye kwrere jire tita nüne arato. Ye abko, Ngöbö Kukwei kuin metre ti nämane dirire amne kukwe kuin Jesubtä ti nämane niere, dokwäre ti kitaba ngite, aiseite ti nämã ngite kã butu kädianta Patmos ye kãnti. **10** Angwane bati bãmãnte, Ngöbö Üai nämã täte tibtä angwane, ti trökri ni kukwei jaraba krikri bäsì drü kukwei kri kwrere tie se kwere. **11** Ni kukwei ye abko kākwe nieba krörö tie:

Jändrän tuata makwe, ye ere-tike jökrä täräbtä, bti nitre gätäkã Jesu kãbti tä juta keta kükü te kã Asiate, ye kãnti makwe juan abko krörö: juta Efeso, Esmirna, Pérgamo, Tiatira, Sardis, Filadelfia amne Laodicea ye ie makwe tārā ye juan, nieba kwe tie.

12 Ye btäräbe ti rikwitateba angwane, ni nämã blite abko tikwe tuaba angwane, oro dätebare ñotra gräre nämã krã kükü, btä ti okwã rababa.

13 Akwa ñotra grã krã kükü ye ngätãite abko ni nämã iti abko bã rababa Ni Kã Nebtä Ngobo kwrere abko btä dãn nga nüke mate ngotobtä temen nämã amne, koria orore abko nämã

^a **1.8** alfa amne omega. Alfa abko tārā okwã kãne alfabeto griegorebtä amne omega abko tārā okwã mrã alfabeto griegorebtä, ye kwrere Jesukristo abko nämãne kãne amne niara rabadi jändrän jökrä täbti mrã.



*Ŋotra grā krā kükü bā kore
(Apocalipsis 1.13)*

kitani ja kötābti ta kwe, btā ti okwā rababa. **14** Angwane niara dokwā driēn abko ngwen būrere jōkrā obeja driēn bātā-ninte kuin deme kā lana bā ngwen būrere, kwrere jire bā rababa tuen tie amne, nieve ngwen būrere, kwrere jire bā rababa tuen tie amne okwā abko rababa trā ngitiekā ŋukwā jutra kwrere jire rababa tuen tie. **15** Erere arato, bronse kukwata kuin ŋukwāte abko tā nebe trā ngitiekā, ye kwrere jire niara ngoto rababa tuen tie amne ŋōta kite kri abko ngōta nebe juuu, ye kwrere jire niara kukwei rababa ruen kri tie. **16** Amne niara kise ruenkri abko te muke nāma kwā kükü rababa tuen tie. Ere-re arato, ngitra tu grine grine jabtā jūt্রে kwārikwāri ye kwrere kukwe rababa betekā kadate, rababa ruen tie amne, nānā trāta ngitiekā dirare, ye

kwrere jire niara ngwāre, raba-ba tuen tie.

17 Ni ye btā ti okwā rababa kore angwane, ti rikaba ngitiekā ngwākāre kwrere niara ngotobtā temen, akwa niarakwe ja kise ruenkri mikaba tibtā, bti nieba kwe tie:

Ma ŋān rekwetaka tibtā. Ti nāmanena jāndrān jōkrā kānen-kri kena amne ti rabadi jāndrān jōkrā tābti mrā. **18** Ti abko tā nūne kārekāre. Ti ne mden krūtani bati, akwa ti nūkaninta nire amne mtare tita nūne kārekāre. Mdakāre abko, ti bāri di kri gata yekrā, aisete tita gata dānkiene amne ti di tārā ni juankrā kārekāre Ngōbō okwā bāre mento amne ti di tārā ni diantarikrā gata ngāniene, ye bā mikakrā llabe gatakwe kā nakebtā tā ti kisete.

19 Ne aisete, makwe jāndrān turi, ye erere tike jōkrā tārābtā. Dre tā nakenkā mtare amne dre rakadikā mtare mentokwāre, ye tike jōkrā tārābtā. **20** Amne muke kwā kükü tā ti kise ruenkri makwe turi, erere arato ŋotra grā orore krā kükü makwe turi, ye abko tā dre bā mike abko tā tiebe, aisete ŋān nibi nūke gare mae, ye abko ti bike niere mae abko krōrō: ŋotra grā orore krā kükü, ye abko nitre gātākā ti kābti juta keta kükü kānti kā Asiate abko bā mikata amne, muke kwā kükü ye abko angeletre ni kükü tā nitre gātākā ti kābti juta keta kükü ngibiabti-kā abko bā turi kore makwe abko nieba kwe tie.

Tārā nitre gātākā Jesu kābti juta Efesote krāke

2 **1** Angwane angele tā nitre gātākā ti kābti juta Efesote ngibiare, ye ie tārā tike krōrō:

Ti kise ruenkri abko te muketa kwā kükü amne ŋotra grā orore krā kükü, ngātāite tita dikekā die mikakāre, ti ne mden kāta niere krōrō: **2** Dre dre nuenta munkwe, ye gare jōkrā tie abko krōrō: Munta sribire tare krūbāte Ngōbōkrā, ye garera tie amne ja tare nikabtā munta nūnenkā dite jabtā, ye gare tie. Mdakāre abko, ni ruāre diān diān tā nūne Ngōbō rūere, tā kite ja Ngōbō kukwei ngwianka niere abko ben munta ja gete ŋakare, akwa munkwe mikani nārāre kuin amne nāmane nāin ni ngōkō, ye abko munkwe gani btātre, aisete munkwe juanintari, ye abko gare kuin tie arato. **3** Mdakāre abko, munta nūnenkā dite tibtā amne munta ja tare nike kri ti dokwāre, akwa mun nebe drāre ŋakare tōdekabtā tibtī, ye abko gare kuin tie arato, yebtā kāta nebe nuāre tibtā.

4 Akwa mun jatani tōdeke kriire tibtī angwane, mun nāmane ti tarere kri, ye kwrere munta ti tarere ŋakare mda, ye aibe tuen blo munbtā tie. **5** Ne aisete mun nāmane ti tarere kri kena, ye ngwenta tōre jae, bti mun jata ja māketa Ngōbōbe angwane, mun

nāmane ti tarere kri kena, ye kwrere munkwe nuenta. Akwa munkwe ŋān nuendreta kore ne ngwane, ŋotra grā tā mun bā mike yete, ye ti bike denkā mento nitre gātākā ti kābti mda mda ngātāite. Akwa munkwe ja mākādita Ngōbōbe ne ngwane, tikwe ŋān ŋotra grā ye diandikā mento munnkān. **6** Akwa kukweta keteti munta nuene kuin abko nitre nicolaita kāta kukwe nuene diān diān, kukwe yebtā mun mātā kri, ye abko kuin tuen tie, ŋōbtā ŋān angwane kukwe nuenta kwetre yebtā ti mātā kri arato.

7 Ye abko, nitre gātākā ti kābti tā nūne juta keta küküte kā Asiate, ye olo tārā, aisete Ngōbō Ūai tā dre niere, ye ie olo ketate kwe mikakāre tāte. Angwane nire nire kākwe ja tare nikadre tōdekabtā tibtī, kākwe ti rükandrete ŋakare abko ni rüe ganainkā kwrere. Ni ye ie tikwe kā biandi kri ngwākā ni mikakrā nūne ye kwetadre angwane, rabadi nūne kārekāre kā kuin Ngōbōkwete abko nieba kwe tie.

Tārā nitre gātākā Jesu kābti juta Esmirnate krāke

8 Yebti nieba mda kwe tie: Angele tā juta Esmirnate nitre gātākā ti kābti ngibiare, ye ie tārā tike krōrō:

Ti Jesukristo nāmanena jāndrān jōkrā kānenkri kena amne rabadi jāndrān jōkrā tābti mrā. Ti krūtani akwa

nükaninta nire abko käta niere krörö: **9** Munta ja tare nike amne mun bobre, jändrän ñakare munkwe, ye gare kuin tie, akwa jändrän Ngöbökwe tärä kabre munkwe kä käinbti sete, aisete Ngöbö ngwäreki mun jändrän bkäne kabre amne ñakare bobre era metre. Mdakäre abko, nitre ruäre tä ja israelita era metre niere abko tä ñäke blo mun rüere, ye gare kuin tie, akwa Ngöbökrä niaratre abko ñakare israelita era metre, ñöbtä ñan angwane tä tödeke ñakare tibti, akwa niaratre tä gätäre Satanakrä. **10** Mdakäre abko, mun kebera ja tare nike tödekabtä tibti angwane, diablukwe ni juandi mun ruäre kite ngite kä teri, akwa munkwe ñan ja tare nikadi raire. Köbö jätäbe munkwe ja tare nikadi. Mun raba ja tare nike kore angwane, munkwe nünanka dite jabtä abti mun krütadi tödekabtä tibti. Mun krütadre kore ti dokwäre, ye ngwane munkwe mun rüe ganandi. Ye ütiäre tikwe mun mikadi nüne kärekäre Ngöböbe.

11 Ye abko, nitre gätäkä ti käfti tä nüne juta keta küküte kä Asiate, ye olo tärä aisete, Ngöbö Üai tä dre niere, ye ie olo ketate kwetre mikakäre täte. Nire nire kākwe ja tare nikadre tödekabtä tibti, kākwe ti rükandrete ñakare abko ni rüe ganainkä kwrere. Ngöbö-kwe kukwe ükadite ni jökrä kräke kä mrä angwane,

Ngöbökwē ñan juandi ja okwä bäre mento, akwa kadi ngäfti kwe nünakäre kärekäre ben, aisete ñan krütadi bobukäre abko nieba kwe tie.

Tärä nitre gätäkä Jesu käfti juta Pérgamote kräke

12 Yebti nieba krörö kwe tie: Angele tä juta Pérgamote nitre gätäkä ti käfti ngibiare, ye ie tärä tike krörö:

Jesukristo kwe ngitra tu grine jabtä jütte kwärikwäri tä abko käta niere krörö:

13 Satana tä gobrane Pérgamote, käfti munta nüne, ye abko gare kuin tie. Satana tä gobrane yete, akwa mun tä tödeke kwatibe tibti, käta nünenkä dite tibtä. Juta munkwe, käfti Satana tä nüne, ye käfti ni iti tödekaka tibti kädian nämane Antipas nämä nüne, akwa kämikani kwetre tödekabtä tibti, akwa ti rükante ñakare kwe. Ye näire mun nämä tödeke kwatibe tibti arato amne munkwe ti rükante ñakare, yebtä käta nebe nuäre tibtä.

14 Akwa kukwe ruäre tä mun ngätäite yete abko ñakare dbe tuen tie abko ti bike niere munye abko krörö: Mekera Moisés näire nitre israelita kākwe ja mikadre ngite Ngöbö rüere, abkokäre jändrän kämikani ngöbö ngwarbeye abko nitre israelita kākwe kwetadre ngöbö ngwarbe mikakäre ütiäre jae amne, ja mikadre gure bati bati

kwetre^b abko ni iti kädian nämane Balaam kākwe diribare kira Balaye abko erere Balakwe bä mikani nuäre nuendre nitre israelita okwäte. Mtare, ni ruäre mun käfti yete tä kukwe ye kwrere mike ütiäre jae, käta ja mike ngite kore, ye abko tuen blo tie.

15 Mdakäre abko, kukwe diribare kira Balaamkwe, ye kwrere arato kukwe dirita nitre nicolaitakwe abkokri ni ruäre mun käfti yete tä neke-te, ye abko tuen blo tie. **16** iNe aisete, munkwe kukwe käme ye kita temen amne munkwe ja mākata Ngöböbe! Munkwe ñan nuendre kore ne ngwane, ngitra tu grine jabtä jütte kwärikwäri, kwrere jire ti kukweita betekä ti kadate, yebti ti näin rüre jökrä niaratrete yete.

17 Ye abko, nitre gätäkä ti käfti tä nüne juta keta küküte kä Asiate, ye olo tärä aisete, Ngöbö Üai tä dre niere, ye ie olo ketate kwe. Kira Ngöbö-kwe mrö kädianta mana biani kwetadre nitre israelitaye nünakäre. Angwane mtare nire nire kākwe ja tare nikadre tödekabtä tibti, kākwe ti rükandrete ñakare abko ni rüe ganainkä kwrere abko ie mana tä ükani tiebe abko tikwe biandi kwetadre ie. Ere-re arato, tikwe jä ngwen

bürere biandi ie nänkrä kä käinbti amne jä yebtä abko ni käi btin tädi tikani abko gare ñakare ni mda mdaye, akwa nire nire ie tikwe jä ye biandi, aibe ie ni käi btin ye rükadi gare.

Tärä nitre gätäkä Jesu käfti juta Tiatirate kräke

18 Yebti nieba krörö mda kwe tie:

Angele tä juta Tiatirate nitre gätäkä ti käfti ngibiare, ye kräke tärä tike krörö:

Ngöbö Odei okwä bä ñukwä jutra kwrere amne bronse bätäninte kuin tä nebe trä ngitiekä, kwrere jire ngoto bä ie abko käta niere krörö: **19** Munta dre dre nuene, ye gare jökrä tie abko krörö: Munta Ngöbö tarere amne ni mda mda tarere amne, munta tödeke kwatibe Ngöböbti amne, munta sribire kuin amne munta ja tare nike tödekabtä tibti angwane, munta nünenkä dite jabtä, ye gare kuin tie. Mdakäre abko, munkwe tödekani krire tibti angwane, mun nämane jändrän kuinkuin nuene, akwa mtare munta nuene bäri kuin, ye abko gare kuin tie arato.

20 Akwa jändrän ketetibe nuenta munkwe abko tuen blo tie abko krörö: Meri tä iti mun ngätäite yete abko ja

^b 2.14 ja mikadre gure bati bati kwetre. Números 25.1-2 tä blite kukwe nebtä. Nitre israelita kākwe ja mikani gure bati bati ngöbö ngwarbe mikakäre ütiäre jae.

Ngöbö kukwei niekä tä niere au jabtä, ye abko tä näin dirire sribikä tikwetikwe ngökakäre, käta näin niere krörö: ja mikadre gure bati bati ngöbö ngwarbe mikakäre ütiäte jae amne mrö ngöbö ngwarbe mikakäre ütiäte abko kwetadre tä näin dirire. Meri kädian nämane Jreina Jezabel kākwe diribare kira, ye kwere jire meri ye tä näin dirire abko munta tuemetre dirire mun ngätäite yete. Ye abko tuen ñakare dbe tie. **21** Meri ye abko kākwe kukwe käme Ngöbö rüere ye kitadre temen, bti tödekadre Ngöböbti kwe, abkokäre tikwe kä biani na ie, akwa tö ja mikai gure bati bati janknu, ye abko ñan tö mikai temen arato. **22** Ne aiseti, ti bike mike ja ngie nuen, kākwe mikadi bren jume amne rabadi ja tare nike jänbti. Erere arato, nire nire käta niara kukwei mike täte amne tä näin ja mike gure bati bati ben, ye abko tikwe mikadi ja tare nike kri krübäte meri ye kukwei mikabtä täte, akwa kukwe käme ye kitadre temen kwetangwane tikwe ñan mikadi ja tare nike kore. **23** Erere arato, nire nire tä nekete niara-kri, ye abko tikwe gadikä jökrä. Yebtä abko kukwe kaibe ni jökrä töibtä abko gare jökrä tie abko rükadi gare tibtä ni jökrä gätäkä ti käbti kä ketareketare temen ie amne, ni itire itire kākwe dre

nuendre, ye erere tikwe ütiä biandi ie.

24 Angwane mun mda mda tä juta Tiatirate yete arato, akwa meri dirikä blo, jiebtimunta näin ñakare amne, kukwe ütiäte Satanakwe tä ükani kaibe tiebe nieta kwetre abko gare ñakare munye. Mun ye abko kötärä tikwe ñan kukwe mdara jire mikadi mda, **25** akwa munta tödeke metre tibti, ye kwere munkwe nuen janknu abti ti jatadi nüketa abko ti tö niei kore munye.

26 Erere arato, nire nire kākwe ja tare nikadre tödekabtä tibti, kākwe ti rükandrete ñakare abko ni rüe ganainkä kwrere amne nire nire kākwe ti kukwei mikadi täte, ye abko tikwe mikadi gobrane nitre nünanka kä ketareketare temen yebti. Ti Rün kākwe ja di biani gobrankrä kore tie, ye kwere tikwe ja di biandi ietre gobrankrä. Ti abko tä gobrane krörö:

27 Angwane niara kākwe gobrandi ja di kribti amne, bäsi dobro sribeta kantrare metata krito ribi jierore bti amne tä ngidiente kiakia jökrä, ye kwrere gobrandi kwe.

Salmas 2.9

28 Erere arato, nitre ganainkä abko ie tikwe muke kri tä kite käin dekä biandi. **29** Ye abko, nitre gätäkä ti käbti tä nüne juta keta küküte kä Asiate, ye olo tärä aiseti,

Ngöbö Üai tä dre niere, ye ie olo ketate kwetre mikakäre täte abko nieba kwe tie.


Tärä nitre gätäkä Jesu käbti juta Sardite kräke

3 1 Yebti nieba kwe tie: Angele tä juta Sardite nitre gätäkä ti käbti ngibiare, ye abko kräke tärä tike krörö:

Jesukristo, kwe üai Ngöbö-kwe ni kükü amne muke kwä kükü tä abko tä niere krörö munye: Munta dre dre nuene, ye gare jökrä tie. Munta nüne kunda nitre Ngöbökrä ni mda mda ngwäreki, aiseti mun tuen kuin ni mda mdaye, akwa ni krütani kwrere jire munta Ngöbö ngwäreki, ñobtä ñan angwane munta nüne käme, käta ja mike ngite krübäte Ngöbö rüere. **2** iNe aiseti mokrere jabt munkwe amne munta dre dre nuene, yebtä munkwe töbika kuin ja käne! Kukwe ruäre kuinkuin munta nuene, akwa kitera neme munye, ye käntarita ja dibti ja käne, tita niere munye, ñobtä ñan angwane sribi nuenta munkwe Ngöbökrä, nin munta nuene täte jökrä tuen tie. **3** Ne aiseti, kukwe diribare munye, munkwe kani ngäbti, ye munkwe ngwianta töre jae abko jiebtimun rankwata, amne munta ja mike ngite Ngöbö rüere, ye kita temen munkwe, kākwe ja makäta Ngöböbe abko tita niere munye. Akwa munkwe ñan mokredre jabt ne

ngwane, ni gokä rükadre ñongwane gare ñakare nie, akwa batibe tä nūke, ye kwere batibe ti rükadi mun mike ja ngie nuen yete.

4 Akwa nitre gätäkä ti käbti, ye ngätäite ni tärä ruäre juta Sardite yete abko tä nüne metre, ñan tä ja mike ngite ni mda mda kwrere, ye abko ni ngämi dän ngwen bürere kwetre mike dobrere kwrere. Ne aiseti, niaratre abko kākwe dän ngwen bürere kitadi jabtä, nünabare metre amne deme bä mikakäre. Niaratre rabadi dikekä tibe dän ngwen bürere te, ñobtä ñan angwane ganainbare jökrä kwetre aiseti. **5** Ye abko, nire nire kākwe ja tare nikadre tödekabtä tibti, kākwe ti rükandrete ñakare abko ni rüe ganainkä kwrere. Nitre ye kākwe dän ngwen bürere kitadi jabtä, niaratre abko metre Ngöbö ngwäreki bä mikakäre, erere nünandre kärekiare Ngöböbe kwetre. Erere arato, nünandi kärekiare kwetre, aiseti



käita tikani tärä ni nünanka kärekäre Ngöböbe mikakrä gare yebtä amne tikwe ñan kä diandrekä mento. Mdakäre abko, ni ye abko ni jen tikwe, tikwe niedi ti Rün ngwärekre amne angeletre Ngöbökre ngwärekre arato. **6** Ye abko, nitre gätäkä ti käbti tä nüne juta keta küküte, ye olo tärä aise, Ngöbö Üai tä dre niere, ye ie olo ketate kwe mikakäre täte abko nieba kwe tie.

Tärä nitre gätäkä Jesu käbti juta Filadelfiate kräke

7 Yebti nieba kwe tie: Angele tä juta Filadelfia nitre gätäkä ti käbti ngibiare, ye ie tärä tike krörö:

Jesukristo abko kuin deme amne kukwe era metre niekä. Erere arato, llabe jrei Davikwe jukwe juta Jerusalén btin ye tikakrä abko tä kisete amne, jukwe dikadre kwe angwane, ni mda ñan raba tiketa jire chi. Erere arato, jukwe tikadre kwe angwane, ni mda ñan raba diketa jire chi. Jesukristo ye abko käta niere krörö mun-ye: **8** Munta dre dre nuene, ye gare kuin jökrä tie. Tikwe jukwe tikani kwati mun kä-nenkri, ye ni mda ñan raba diketa jire munkän abko tuen nete. Mun abko di ñakare bökan nünankrä tikrä, akwa munkwe ti kukwei mikani täte jökrä amne munkwe ti rükä-ninte ñakare. **9** Ye abko, nitre ruäre därebare ni israelitakri tä ja israelita niere au jabtä,

akwa niaratre tödeke ñakare tibti, aise, ñakare israelita era metre Ngöbö ngwärekre. Niaratre tä ngwarbe ni ngökö amne niaratre abko Satana-kwe era metre. Niaratre ye abko tikwe ngwiandi nuke ja mike bobre ngukudokwäbti mun ngotobtä temen angwane, tita mun tarere kri abko niedi kore kwetere.

10 Angwane munkwe ja tare nikadre tödekäbtä tibti angwane, munkwe nünandrekä dite jabtä, tikwe nieba, erere munkwe mikani täte jökrä. Ye mden kisete, Ngöbökre kukwe juandi kri ni jökrä kä nebtä nünanka Ngöbö rüere ye rüere, niaratre nuatekäre ja käne angwane, nitre ye käkwe ja tare nikadi kri, akwa mun abko käkwe ti kukwei mikani täte abko ütiäre tikwe mun ngibiadi ja tare nika ye ngäni-ene. **11** Ti abko jatadita jötrö ngwarbe, aise, munta nüne metre ti ngwärekre, ye kwrere munkwe ja ngibia janknu, ñobtä ñan angwane munkwe nünandi kärekäre Ngöböbe abko korona kwrere, ye ni mda mda käkwe ñan diandrekäta munkän, abkokäre munkwe ja ngibia janknu. **12** Angwane nire nire käkwe ja tare nikadre tödekäbtä tibti, akwa ti rükandrete ñakare kwe abko rüe ganainkä kwrere. Ni ye abko ürä nökan nguse Ngöbö tikwe jue ye täni ñan rabadre denkä jire, ye kwrere jire ni mda ñan rabadre ni ganainkä denkä

tikan Ngöbö kanti mento. Erere arato, niara abko jen Ngöbökre, abkokäre tikwe Ngöbö tikwe käi tikadi ni ganainkäbtä amne, juta Jerusalén btin Ngöbökre tä kä käinbti, akwa kebera kite temen, ye käi tika-di tikwe ni ganainkäbtä niara abko nünanka juta Jerusalén btinte bä mikakäre. Angwane niara abko jen tikwe arato, ye bä mikakäre tikwe ja käi btin tikadi btä arato. **13** Ye abko, nitre gätäkä ti käbti tä nüne juta keta küküte, ye olo tärä aise, Ngöbö Üai tä dre niere, ye ie olo ketate kwe mikakäre täte abko nieba kwe tie.

Tärä nitre gätäkä Jesu käbti juta Laodiceate kräke

14 Yebti nieba mda kwe tie: Angele tä juta Laodiceate nitre gätäkä ti käbti ngibiare, ye kräke tärä tike krörö mda:

Jesukristo abko kä Amen, ñobtä ñan angwane niara abko käta ja kukwei mike täte metre amne niara abko kukwe era erere niekä. Jesukristo köböire jändrän jökrä namani bare Ngöböye kena. Niara ara käta niere krörö mun-ye: **15** Munta dre dre nuene, ye gare kuin jökrä tie. Ni tibo abko ni tödekä ñakare tibti kwrere amne ni ngire abko ni nüne ja di ngöi jökrä tikrä kwrere, akwa mun abko ñakare tibo amne mun ñakare ngire arato. iMun ye rabadre tibo ni tödekä ñakare tibti kwrere näre o mun rabadre ngire

ni nünanka ja di ngöibti tikrä kwrere näre! **16** Akwa mun abko ñakare tibo amne mun ñakare ngire. Mun krube jire-käbe, aise, munta abko ni ütiä-te ñakare jire kwrere, ye do-kwäre abko tikwe mun yaidi jirekäbe mentokwäre.

17 Mdakäre abko, mun jändrän bkäne kri, munta niere. Erere arato, munta jändrän mdei nike ñakare, aise, munta nüne kuin, munta niere. Akwa mun abko ni bobre, ngwarbe, amne jändrän bäri ütiäre Ngöbökre ñakare munkwe amne kä iko mun okwäte, ñobtä ñan angwane kukwe era metre Ngöbökre nuke gare ñakare mun-ye. Erere arato, munta ja mike ngite krübäte, abtä munkwe ja gaidre, ye abko munta dikekä bütiere Ngöbö okwäbti ye kwrere abko munta gain ñakare jabtä, aise, munta abko bobre Ngöböta nütüre munbtä. **18** Ne aise-te, mun rabadre jändrän Ngöbökre bkäne era metre, abkokäre mun jata kökö tie. Ye abko, jändrän ütiäre kri krübäte Ngöbökre oro kuin kukwani ñukwäte mikakäre orore metre, kwrere tärä tikwe makrä, aise, munta jata kökö tie. Erere arato, tikwe mun mikadre metre ja ngwärekre, ye bä mikakäre dän ngwen büriere ye mun jata kökö jökrä tie, bti munkwe mun bütiäkrä gaidre kri ye jue mika angwane, mun ñan rabadre dikekä bütiere mda.

Mdakäre abko, kukwe Ngöbö-kwe ye gare ñakare munye, aiseite kä iko mun okwäte kwrere, ye kräke abko mun jata kräkä kökö tie kitadre ja okwäte, ye köböire abko Ngöbö kukwei rabadi gare metre munye abko tita niere.

19 Nire nire tareta tikwe abko btä tita mäträre töi diankäre. Ne aiseite, munkwe ja di mikata kri käre-käre nünakäre ja di ngöibti tikrä amne, munkwe kukwe käme kita jökrä temen amne munkwe ja makäta Ngöböbe amne tibe. 20 iTita nete! Ti abko tä jukwebtä, käta ñäke, ye mike ñäre. Nire nire, ie ti kukwei jaradre, käkwe ti käre-dre gwä angwane, ti näin kanti nebe gwi abko ben tikwe mrödi siä kwatibe te. 21 Angwane tikwe ja tare nikaba, akwa tikwe Ngöbö rükanteba ñakare abti ti krütä, aiseite tikwe kukwe blo ganainbare kwäräbe jökrä, ütiäre Ngöbö-kwe ti mikani takänintbe gobrane ketetibe jabe, ye kwrere nire nire käkwe ja tare nikadre, akwa ti rükandrete ñakare kwe abko rabadre kukwe blo ganaine kwäräbe jökrä arato. Nitre ye abko tikwe mikadi takänintbe gobrane ketetibe jabe arato. 22 Ye abko, nitre gätäkä ti käbti tä nüne juta keta köküte, ye olo tarä aiseite, Ngöbö Üai tä dre niere, ye ie olo ketate kwe mikakäre täte abko nieba kwe tie.

Kürä gobrankrä, bti Ngöbö nämane takänintbe

4 1 Yebti tikwe nikraba angwane, jukwe nämä tika-ni kä käinbti, btä ti okwä rababa. Angwane ni kukwe kri, drü kri kwrere tikwe kukwe nuaba käne, ye kwrere jire kukwe jara-bata tie abko käkwe nieba krörö tie:

Jakwe kä käinbti nete amne, kukwe rakadikä ño ño mda abko ti bike mike tuadre mae, nieba kwe tie.

2 Ye btäräbe Ngöbö Üai rüka-ba täte jökrä tibtä angwane, kürä gobrankrä, yebti ni nämä takänintbe iti gobrane kä käinbti, btä ti okwä rababa. 3 Angwane niara bā rababa tuen trä ngitiekä tie. Jä ngwen bürere kädianta brillante, kwrere jire rababa tuen tie. Erere arato, jä bā tain trä ngitiekä, kwrere jire bā rababa tuen tie amne, kürä niara takrä-re, ye bäre temen abko mrüträ nämä krati. Mrüträ ye abko raba-ba trä ngitiekä rerebare bäsi jä tuäre trä rerebare kädianta esmeralda, kwrere bā rababa tuen tie. 4 Mdakäre abko, kürä gobrankrä ye bäre ta abko kürä mdara jire nämä kwä gre bti kobkä. Kürä yebti abko nitre unbre unbre nämä takänintbe ni gre bti nibkä. Nitre ye abko metre amne deme, ye bā mikakrä dän bā ngwen bürere nämä kitani btäre amne korona orore orore nämä mikani dokwäbti, btä ti okwä rababa. 5 Angwane kürä gobrankrä ye kanti merabe rababa trä

ngitiekä amne kä ngö rababa ruen rikri be tie. Erere arato, unsuni aibe ngö rababa ruen tie amne kürä gobrankrä ye känen-kri ñotra nämä jutra ngitiekä krä kökü. Ñotra krä kökü nämä trä ngitiekä ye abko Ngöbö üai ni kökü, btä ti okwä rababa. 6 Mda-käre abko, kürä gobrankrä ye känenkri abko mren trä ngitiekä bidrio kwrere nämä.

Angwane kürä gobrankrä ye bäre ta abko jändrän nire nämä kräbkä. Jändrän ye abko okwä jökrä ngrabare, okwä jökrä ngwäre-kri amne trökri abko tikwe tuaba. 7 Jändrän kräbkä tikwe tuaba, ye abko krati raba-ba tuen lion kwrere jire tie. Krobukäre abko rababa tuen buey kwrere tie amne, krämäkäre abko ngwäre rababa tuen ni kwrere tie amne kräbkäkäre abko mü kri tä nakenkä kainta, ye kwrere jire rababa tuen tie. 8 Jändrän kräbkä tuaba tikwe, ye abko kratirekratire ngike krä ti rababa tuen tie amne ngike btä abko okwä rababa tuen jökrä btärikri amne terikri tie. Angwane jändrän ye abko käre dibire rare nämä jadüke ñakare, nämä niere krörö:

Ngöbö ni Dänkien Di Kri Jändrän Jökrä Nuenkrä, ma abko deme, deme, deme.

Ma nämänena nüne kena amne, mata nüne amne ma ara jatadi, nämä niere. 9-10 Angwane Ngöbö nämä takänintbe gobrane kürä gobrankräbti, ye abko

jändrän kräbkä ye nämä käiki-tekä batire batire amne, nämä mike ütiäre kri jae, kä nämä kuin niere Ngöbö nünanka käre-käre yeye. Angwane nitre unbre unbre ni gre bti nibkä ye tä nebe ngukudokwäbti niara ngwäre-kri, käta korona jakwe mike temen Ngöbö ngwäre-kri, Ngöbö-kwe kä biani gobrane ietre bā mikakäre, käta niere krörö:

11 Ni Dänkien Ngöbö, ma aibe ngöräbe käikitadrekä amne ma aibe raba mikani ütiäre amne ma aibe di kri, ñobtä ñian angwane makwe jändrän jökrä dätebare amne, ma aibe köböire jändrän jökrä tä mtare,

abko nitre unbre unbre nämä niere kore, rababa tuen tie.

Kordero abko ütiäre taräkwata mrianinkä ye metatekä

5 1 Angwane kürä gobrankrä, bti Ngöbö nämä takänintbe. Niara kise ruenkri abko taräkwata mrianinkä ketaninte nämä, btä ti okwä rababa. Taräkwata ye abko nämä tikani jökrä terikri amne btärikri amne, nämä ketaninkä kuin bā kökü ja taritäre munkwatabti, rababa tuen tie. 2 Angwane angele bäri di kri nämä iti, btä ti okwä rababa amne, angele ye käkwe ngrateba kri käkwe nieba: 'Nire bäri ütiäre kri abko käkwe taräkwata ne metadite amne, munkwata keta

kükü mikani ja täritäri täräkwa-
ketakakrä abko nirekwe diandikā
täräkwatābtā amarebtī ye? raba-
ba niere kore. **3** Akwa kā käinbtī,
kā temenbtā, amne dobo tāni
abko ni kwanba ñakare jire iti
täräkwa ye metatekā amne
ñākākā btā. **4** Ni ütiāte ñan
kwanba jire iti täräkwa ye
metatekā amne ñākākā tärābtā ti
okwābtī, yebtā abko ti rababa
müen krübāte. **5** Abtā nitre
unbre unbre nāma siba yete abko
iti kākwe nieba tie:

Makwe ñan müa mda, ñobtā
ñan angwane ni iti Judā mrākā-
kri abko dite kwra lion kwrere,
niara abko jatani David bkünkri
amne niarakwe jändrän jökrā
Ngöbö rüere ganainbare kwärā-
be, aisete niara abko bāri ütiāte
kākwe tārā se metadite amne
ketaninkā bā kükü ja täritäri se
diandikā kwe arato, ni unbre ye
kākwe nieba kore tie.

6 Ye btärābe, Ngöbö nāma
tākānintbe kürā gobrankrābtī, ye
ngätāite amne jändrän krābkā ye
ngätāite amne nitre unbre unbre
ni gre bti nibkā ye ngätāite ni
nāma iti abko rababa tuen Korde-
ro kwrere tie. Ni ye abko nāma
nūnaninkā, akwa Kordero müre
ketani, kwrere jire rababa tuen
tie. Erere arato, ni ye abko di kri,
aisete niara di ye abko rababa
tuen kroture krā kükü tie amne
niara okwā rababa tuen kwā kükü
tie, ye abko Ngöbö üai ni kükü tā
nāin kā jökrābtī temen abko
tikwe tuaba. **7** Angwane Ngöbö
nāmane tākānintbe kürā gobran-
krā yebti, ye kise ruenkri

täräkwa nāma, ye ni Kordero
kwrere ye kākwe dianba kisete ti
okwābtī. **8** Niarakwe täräkwa
ye dianba kisete, ye btärābe jän-
drän krābkā nāma yete amne
nitre unbre unbre ni gre bti nibkā
nāma yete, ye rikaba ngitiekā
ngukudokwābtī temen ni Kordero
kwrere ye ngwārekri, niara mika-
kāre ütiāte jae. Angwane nitre
unbre unbre ye kisetekisete abko
arpa nāma amne, blato kiakia
orore orore ngwian nāma kisete-
kisete kwetre arato abko te kri
ngwāri mnüne rā bāne nāma kwe-
tre. Kri ngwāri mnü rā bāne nāma
blatote kwetre, ye abko ni itire iti-
re tödekaka Jesubti tā nüne kuin
deme Ngöbökrā kāta blite Ngöbö-
be abko bā nāma kore kwetre.
9 Angwane niaratre rababa ka
btin niere krörö ni Kordero kwre-
re ie:

Ma aibe ütiāte kri, kā raba
täräkwa ye den kisete
amne ketaninkā
munkwatābtī, ye ma aibe
raba denkā mento,
ñobtā ñan angwane ma
abko müre ketani ni
krāke amne,
ja dāriebtī makwe ni
bātākā ngwarbe
kökanintarita Ngöbökrā.
Ye abko, ni kukwe bātākā
ngwarbe amne
ni juta kwatirekwatire te
amne
ni nūnanka kā
ketareketare temen,
te makwe ni kökanintarita
ruäre rabakāre ni jen
Ngöbökwē.

10 Amne ma köböire Ngöböta
gobrane ni tödekaka
mabti yebti
amne makwe mikani
sribire ni blitaka
Ngöböbe ni mda mda
diäre kwrere Ngöbö
nikwe krāke.
Amne niaratre kākwe
gobrandi kā nebtā mabe,
abko nieba kwe ti okwābtī.

11 Yebti tikwe nikrabata mda
angwane, Ngöbö nāma tākānin-
tbe kürā gobrankrābtī, ye bāre
temen amne jändrän krābkā ye
bāre temen, erere arato nitre
unbre unbre nāma ye bāre temen
angele kukwei rababa ruen kwati
krübāte tie. Ye erere bkānā,
angeletre nāma kwati kwati krü-
bāte abko ni ñan rabadre tanre
12 amne rababa Jesu bā mike
Kordero kwrere, kā rababa
ngrente ja dibti, kā rababa niere:

iKordero ye müre ketani ni
diantarikāre,
ye ütiāre abko Ngöbökwē
ja di kri mikani niara
kisete amne raba jändrän
jökrā bkāne!
iErere arato, niara aibe
raba töbtā kri amne di
raba jändrän jökrā bti ta
amne,
niara aibe raba mikani
ütiāte jae amne
raba käikitaninkā amne
demainbare!
abko angele kukwei rababa ruen
kore tie.

13 Yebti jändrän jökrā dāteba-
re Ngöbökwē tā nüne kā käinbtī,
kā temenbtā, dobo tāni amne

mrente abko kukwei rababa ruen
krörö tie arato:

iNgöböta tākānintbe
gobrane kürābtī amne
Jesu Kordero kwrere,
niaratre nibu ye aibe
raba demainbare amne
raba mikani ütiāte kri!
iErere arato, raba
käikitaninkā amne raba
ja di bkāne kri kärekāre!

abko jändrän jökrā rababa niere
kore. **14** Angwane jändrän krā-
bkā nāma kürā gobrankrā bāre
temen, ye abko rababa niere:
iJān, ye kwrere raba bare!
iAmen! rababa niere. Angwane
nitre unbre unbre ni gre bti
nibkā, ye rababa jökrā ngukudo-
kwābtī temen Ngöbö amne ni
Kordero kwrere ye ngwārekri,
niaratre mikakāre ütiāte jae abko
tikwe tuaba kore.

**Munkwata diandrekā tärābtā
angwane dre dre rakadrekā**

6 1 Yebti ni Kordero kwrere
ye kākwe munkwata tārā-
kwata ketakakrä keta kükü ye
diankaba keteti kāne ti okwābtī
angwane, jändrän krābkā nāma
kürā gobrankrā bāre temen, ye
krati kākwe ñākāba krikri be
abko kukwe rababa ruen unsuni
ngö kwrere tie abko kākwe nie-
ba: iJakwe! nieba kwe. **2** Ye btā-
rābe tikwe nikraba angwane,
mdā ngwen bürere nāma, btā ti
okwā rababa. Angwane ni nāma
nāin mdā yebti abko nāma
tukwen rükrā ngwena kisete
amne, niarakwe rüe ganaindre
ye bā mikakāre korona bianba

ie, bti niara rikaba ni jökrä ganaine rūbtā.

3 Yebti ni Kordero kwrere ye kākwe munkwata ketebu tārākwata ketakkrā ye diankaba angwane, jāndrān nāma kürā gobrankrā bāre temen ye krobu-kāre kukwei jaraba tie, kākwe nieba krörö: iJakwe! nieba kwe. 4 Ye btārābe, mdā mda jataba tuen tie. Mdā ye abko bā tain amne ni nāma nāin bti abko kākwe kā jāme diandrekā jökrā nikān kā nebtā amne, ni rabadre ja kāmike jökrā kwārikwāri, abkokāre ja di bianba ie angwane, ngitra kri bianba rūkrā ie arato.

5 Yebti ni Kordero kwrere kākwe munkwata tārākwata ketakkrā diankaba ketamākāre angwane, jāndrān nāma kürā gobrankrā bāre temen ye krāmākāre kukwei jaraba tie, kākwe iJakwe! nieba. Ye btārābe tikwe nikraba angwane, mdā bā drūne, btā ti okwā rababa amne, ni nāma nāin mdā yebti abko nāma jāndrān dābā nuatekrā ngwena kisete. 6 Angwane jāndrān ketakbā, ye ngātāite Ngöbö kukwei jaraba krörö tie:

Makwe mrö gaka kā jökrābti temen. Yebtā abko ngwian ganaindre köböiti abko biandre jökrā trigo kilo kratibe btā. Erere arato, ngwian ganaindre köböiti abko bti sebada kökadre kilo krāmābe jökrā, akwa olibo kōi amne

uba dōi,^c ye abko makwe fīan juan ngwarbe jire chi, nieba kore kwe abko jaraba tie.

7 Yebti ni Kordero kwrere ye kākwe munkwata tārākwata ketakkrā diankaba bābkākāre angwane, jāndrān nāma kürā gobrankrā bāre temen, ye abko krābkākāre kākwe iJakwe! nieba. 8 Ye btārābe tikwe nikraba angwane, mdā bā ngwen būrere nita kite krüte bāta nebe kwrere, btā ti okwā rababa. Mdā yebti abko ni kādekata Gata nāma nāin amne Gata jiebtī abko ni kā nakebtā ngibiabtikā nāma nāin, ni kāmikani Gatakwe ngwiandre ja tare nike kā nakebtā abkokāre. Ngöbökwē köbö biani ietre ni kāmikakrā krörö: Nita nūne kā ketareketare temen abko tā fīākānintbe ketabkā ye abko kāmikadre keteti rūbtā. Erere arato ni krütadre mrö miare, bren kisete amne kwra krübātekrübāte kākwe ni ye kāmikadre abko ere-re Ngöbökwē köböi biani ietre.

9 Yebti ni Kordero kwrere ye kākwe munkwata tārākwata ketakkrā diankaba bārikekāre angwane, nitre Ngöbö kukwei mikaka gare kākwe nūnankabare dite Jesubtā amne niara rūkanintē fīakare kwetre abtā kāmikani abko ūai nāma fīukwā grā tāni, sribi kwekwē Ngöbökrā nāmane dbe krāke bā mikakrā, btā ti okwā rababa. 10 Angwane niaratre ūai nāma fīake ja dibti krörö:

^c 6.6 olibo kōi amne uba dōi. Mrö mda mda nāmane krüte jökrā angwane olibo kōi amne uba dōi aibe nāmane angwane yebti rabadre nūne, aisete mrö jökrā ngātāite ye abko bāri ūtiāte nūnankrā.

Ngöbö, ma abko Gobranka jāndrān jökrābti amne ma deme amne ma abko kukwe era niekā kāre. Nitre nūnanka ma rūere kā temenbtā kākwe nun kāmikani tōdekabttā Jesubti, ye abko ūñōngwane kukwe ūkadite krāke, kākwe mikadi ja ngie nuen nun dokwāre amarebti ye? nāma niere kore. 11 Angwane dān bā ngwen būrere bianba ietre, niaratre abko metre Ngöbö ngwārekri bā mikakāre. Kukwe ūkarete nitre niaratre kāmikaka krāke, ye abko ngibiadre ken kwetre abti niaratre mrākā sribikā Ngöbökrā mda mda kāmikadre tāte jökrā abko rabadre jökrā ketetibe bentre angwane, Ngöbökwē kukwe ūkadite niaratre rūekrā, kākwe rūe mikadi ja ngie nuen niaratre dokwāre, nieba kwe ietre.

12 Yebti ni Kordero kwrere ye kākwe munkwata tārākwata ketakkrā diankaba bā tikāre angwane, tikwe mikaba fīārāre angwane, dobo rababa nakaenkā kri krübāte kā temenbtā, rababa tuen tie amne fīānā abko bā rikwitaba iko jökrā. Bāsi dān drūne, ye kwrere jire fīānā bā rababa. Sō abko bā rikwitaba tain būrere dāri kwrere rababa tuen tie. 13 Angwane kri ngwākā kādekata higo abko tā kite tain mrā abko mūreta kite mate ribi kāta mūnente jökrā higo kriēbtā, ye kwrere jire muke rababa betekā timontimon kā temen nebtā rababa tuen tie. 14 Angwane tārākwata mriakata, ye kwrere jire kā kāinbti se rikaba nibrenkā, nibrenkā, nibrenkā angwane,

fīan rababa mda rababa tuen tie amne, Ngöbökwē kā tokwā krikri amne kā butu mrente mrente diankaba jökrā mento arato, rababa tuen tie.

15 Angwane nitre jreire kā nebtā gitiaba jökrā kā mkāte amne jākwwata mkāte ngitiobti Ngöbö ngāniene. Erere arato, nitre gobranka krikri amne nitre rūkā dānkien amne ni jāndrān bkānkā krikri amne ni ūtiāte krikri, btā nitre klabore amne nitre fīakare klabore nūnanka Ngöbö rūere gitiaba jire jökrā kā mkāte jrei ben gwaire Ngöbö ngāniene, 16 kā rababa niere krörö ngitiōye amne jākwwataye: Ngöböta tākānintbe kürā gobrankrābti amne ni Kordero kwrere mātā kri, se ngāniene nun ūke ja tāni amne jakwe nunbti temen, 17 fīobttā fīan angwane Ngöbökwē ni mikadre ja ngie nuen kri krübāte abko kāi nūra, ūse abko nirekwe nūnandre-kā jabtā Ngöböbe se? nitre nūnanka Ngöbö rūere rababa niere kore ti okwābti.

Ngöbökwē ni jen kwe ngibiadi jenena jakrā

7 1 Yebti angele nāma nibkā, btā ti okwā rababa mda. Angele nāma iti kā driri, iti nindrini, iti ngwitārākri amne iti mōtarikri. Angwane mūre fīan rabadre mate mda kā nebtā, mrenbtā amne kribtā, abkokāre niaratre nāma mūre ketebttā. 2 Ye btārābe angele mdara jire nāma kā driri jataba arato abko Ngöbö nire kāi nāma tikani jābtā abko ngwian nāma kisete kwe.

Angele ye rükaba angwane, angele nibkä ie Ngöbökwe ja di biani kä juankrä ngwarbe amne mren juankrä ngwarbe mürebt, yebti angele rükaba mrä kākwe ngrateba kri ja dibti, kākwe nieba krörö:

3 Nitre sribikä Ngöbö nikwe kräke, ye okobtä Ngöbö käi keta-ka ngämi ngibiakäre Ngöbö mätä kri ye ngäniene, ye känenkri munkwe ñan kä temen ye juan ngwarbe. Erere arato, munkwe ñan mren amne kri juan ngwarbe mürebt, nieba kwe ietre ti okwäbti.

4 Angwane nitre israelita nibe btä Ngöbö käi ketadrekä ngibia-käre kukwe taretare ngäniene nieba jökrä abko 144,000 abko ni kukwei jaraba kore tie.

5 Nitre därebare juta Judäkri btä Ngöbö käi ketakaba abko 12,000.

Nitre därebare juta Rubénkri abko 12,000, juta Gakri abko 12,000.

6 Juta Aserikri abko 12,000, juta Neftalikri abko 12,000, juta Manasékri abko 12,000.

7 Juta Simeónkri abko 12,000, juta Levíkri abko 12,000, juta Isacarekri abko 12,000.

8 Juta Zabulónkri abko 12,000, juta Josékri abko 12,000, juta Benjamínkri abko 12,000 arato.

Ni kwati dän ngwen bürere kitani btä kākwe Ngöbö käikitaninkä

9 Yebti tikwe nikraba angwane, ni kä jökräbti temen nämä kwati, btä ti okwä rababa. Ni bätäkä ngwarbe amne ni kukwe bätäkä ngwarbe nämä, erere arato ni nünanka juta bätäkä ngwarbe, ye nämä kwati kwati krübä-te nünaninkä kürä gobrankrä Ngöbökwe ken amne ni Kordero kwrere ye ngwärekre, btä ti okwä rababa. Nitre rababa kwati krübä-te, aisele ñan rababa tanre jire chi. Nitre ye abko ngite ñakare mda Ngöbökwe niebare btätre, ye bä mikakrä abko dän bä ngwen bürere bürere te nämä näin amne nämä datile krikä^d ngwena kisetekisete kä ngwian-käre nuäre jabtä. 10 Angwane rababa ngrente ja dibti, kä rababa niere krörö:

iNgöböta tākānintbe kürä gobrankräbti amne ni Kordero kwrere, ye aibe köböire nita nebe dianintari jökrä!

rababa niere kore.

11 Angwane kürä gobrankrä bti Ngöbö nämä tākānintbe ye bäre temen, nitre unbte unbte bäre temen btä jändrän kräbkä ye bäre temen angeleleträ nämä nünaninkä jökrä, kākwe ja okokrä mikaba neme dobtä temen, kākwe Ngöbö käikitakaba, 12 krörö:

^d 7.9 datile krikä. Datile krie abko dba krie kwrere, akwa tukwä ñakare btä amne ngwä abko mane amne bänante, aisele kuin kwetadre.

iAmen!

Ni jökrä raba Ngöbö demaine amne käikitekä amne, Ngöbö aibe töbtä kri amne ni jökrä raba kuin niere kärekre ie. Erere arato, Ngöbö aibe mika ütiäte jae amne niara aibe di kri jändrän jökrä bti ta.

Ye aisele Ngöbö nikwe ye aibe abko mika ütiäte kri kärekre ni jökräkwe. Abko kore se.

iAmen!

abko angeleleträ rababa niere kore.

13 Ye btäräbe nitre unbte unbte iti kākwe nieba krörö tie: ¿Nitre dän ngwen bürere ngwen bürere kitani jabtä, se abko nire amarebti se? Mdakäre abko, ¿niaratre kä mdenbo tä näin ruen? nieba kwe tie.

14 Angwane tikwe nieba mda ie:

Ne abko. Niaratre garera mae ti mräkä, aisele makwe nie tie, tikwe nieba ie.

Abtä niarakwe nieba krörö mda tie:

Ja tare nikani kri tödekabtä Jesubti angwane, nitre se kākwe ja tare nikani arato, akwa krütani tödekabtä bti abko mden se. Angwane dän bätäteta kuin tä nebe ngwen bürere, ye kwrere niaratre kākwe tödekani Jesubti angwane, ja bätäninte ni Kordero kwrere däriete kwetere angwane, Ngöbökwe niaratre ngite dianinkä mento btä abko dän ngwen bürere bürere bä mikata btä mtare.

15 Ye mden kisete kürä gobrankrä Ngöbökwe, bti Ngöböta tākānintbe gobrane abko kanti niaratre tä sribire Ngöbökrä dibire rare mtare.

Ngöbökwe niaratre ngibiadi kärekre.

16 Ye kanti ñan mrö nikadre mda kwetere amne ja tare nikadi ñakare mda kwetere tomna miare.

Erere arato, ñänankwe ñan kukwadre jire chi mda amne kä ngire kākwe ñan nikadre jire chi mda,

17 ñöbtä ñan angwane ni Kordero kwrere tä kürä gobrankrä Ngöbökwe kanti abko kākwe niaratre ngibiadi.

Nitre obeja ngibiaka tä obeja ngibiare, ye kwrere ngibiadi kwe.

Angwane ñö ni mikaka nüne kärekre, ye kanti näin niaratre ngwena ñö tuen jae.

Amne kukwe taretare btä tätre müen, ye ñan rabadi jire chi mda amne Ngöbökwe okwä ñöi rötadi jökrä ietre,

abko nieba kore kwe tie.

Tärä ketaninkä bä kükükäre amne blato orore

8 1 Yebti ni Kordero kwrere kākwe munkwata täräkwa ketakakrä diankaba bä kükükäre angwane, ñänä okwä ötare näre kä rababa kwekre kä känbti sete.

2 Yebti tikwe nikraba angwane, angele nāma nūnaninkā ni kükü Ngöbö ngwärekre, btā ti okwā rababa angwane, angeletre ye abko ie drü bianba krā kükü. 3 Bti angele mdara jire jataba. Angele ye abko nāma blato chi orore kri ngwāri mnü rā bāne kukwakrā ye ngwena kisete abko rükaba ñukwā grā ye kanti, raba-ba nūnaninkā. Ye btārābe, kri ngwāri mnü rā bāne bāne bianba kabre kukwadre ñukwā grā ororebti kürā gobrankrā Ngöbökwe ye kanti amne, juta deme Ngöbö-kwe kākwe kukwe ribeba Ngöbö-ye ye ben gwaire. 4 Angele rababa kri ngwāri mnü rā bāne kukwe ye ngübü rababa niken angele ye kisete kukwāne nebe Ngöbö ngwärekre, juta deme Ngöbökwe namani blite Ngöböbe abko bā mikaba kore. 5 Angwane angele rikaba ñukwā grā kanti, kākwe ñukwā bda diankaba, mikaba blato orore kri ngwāri mnü rā bāne kukwakrā te kwe, bti ñukwā bda ye kitaba kā temen nebtā kwe. Ye btārābe unsu-ni ngö rababa krikri be. Erere arato, kā ngö rababa ruen krikri, mera trā rababa amne dobo rababa nakaenkā se kwrere.

Drü jūkani krā kükü ja täritäri

6 Angwane angeletre ni kükü ye abko kākwe ja mikani juto biare drü krā kükü ye jūkakäre. 7 Ye erere bkānā, angele iti kākwe drü jūkaba kāne, ye btārābe ñü bürere jā kukwān kwerekwrere amne ñukwā jutra mritani dāribe mni mni abko

Ngöbökwe juanba kā temen nebtā, ye abko kātā ñākānintbe ketamā abko kukwaba keteti jire temen. Erere arato, kri krikri kukwaba keteti jire, akwa mikā rerebare kukwaba jire jökrā kwe.

8 Yebti angele nibukäre kākwe drü mda jūkaba angwane, jändrän bāsi ngitio kri jutra ngitiekā jökrā, kwrere jire kitaba mrente angwane, mrenta ñākānintbe ketamā abko keteti rikwitaba dārire. 9 Angwane jändrän jökrā nūnanka mrente rabadre ñākānintbe ketamā abko gataba keteti nāre. Erere arato, ru mrente ñākānintbe ketamā abko juanba ngwarbe keteti nāre.

10 Yebti angele nimākäre kākwe drü jūkaba. Ye btārābe muke kri jutra ngitiekā ñotra kwrere nāma kā kāinbti, betakaba timon abko rikaba mate ñö krikri amne ñö kiakia ketamā abko keteti te rikaba mate.

11 Muke ye abko kādian nāma Kwaka abko rikaba mate ñöte, ñöbtā ñan angwane ñöta ñākānintbe ketamā abko keteti rikwitaba kwaka jökrā. Ñö kwa-ka, ye kisete ni krütaba kwati krübāte ñö ye ñabtā.

12 Yebti angele nibkākäre kākwe drü jūkaba angwane, kātā ñākānintbe ketamā ñānānte amne sōte abko keteti rikaba ngwarbe amne muketa ñākānintbe ketamā abko keteti rikaba ngwarbe arato. Ne aisetē, kā keteti nāre ñānānte amne sōte abko rikwitaba iko jökrā amne muke keteti nāre rababa iko arato. Ye mden kisete, ñānā okwā

krā kwā kā ngwenbti kā trā raba-ba ñakare. Erere arato, ñānā okwā krā kwā deo kā trā rababa ñakare arato.

13 Yebti tikwe nikraba angwane, mü kri nāma nikenkā kāinta abko ngö jaraba tie amne mü ye rababa ñāke ja dibti, kā rababa niere krörö: !Aingwaree, nitre nūnanka Ngöbö rüere kā temenbtā abko bobre jakān, ñöbtā ñan angwane angele nimā mda kebera drü jūke ja täritäri aisetē! rababa niere kore.

9 1 Yebti angele niriekäre kākwe drü jūkaba angwane, angele bā muke kwrere nāma kā kāinbti betaninkāra timon nūke kā temen nebtā abko tikwe tuaba. Angwane kā mkā kri kādianta Kā Timonbti krāke llabe bianba ie jukwe Kā Timonbti ye tikakrā. 2 Ye erere bkānā, angele ye kākwe jukwe tikaba Kā Timonbti angwane, ngübü tā nebe neen krikri be, ye kwrere jire ngübü rababa kite kabre kukwāne abko kākwe ñānā trā mikaba diore amne kā kāinta rababa diore ngübü kisete arato. 3 Angwane ngübü yete abko tröda jataba kwati krübāte mda abko rikaba kā jökrābti temen kā nebtā. Tröda ye abko ie kā bianba ni tākātekäre bāsi dibe kwrere. 4 Tröda ye abko kākwe ñan mikā kwetadre amne kri mu jökrā rerebare ñan kwetadre kwetre. Erere arato, kri jökrā ñan kwetadre jire chi kwetre, nieba Ngöbökwe ietre; akwa nire nire tödekaka ñakare Jesu-bti, aisetē Ngöbö kā ñakare

ketaninkā okokrā btā, ni ye kwrerekwrere aibe mikadre bren kwetre, nieba Ngöbökwe ietre. 5 Akwa tröda ye abko ie Ngöbö-kwe kā bianba ni mikakrā bren jume jirekābe, akwa kā bianba ñakare kwe ietre ni kāmikakrā. Angwane dibe tā ni tākete abko tā nebe tare krübāte nie, ye kwrere tröda ye kākwe nitre ye mikadre bren, kākwe ja tare nikadre krübāte sō krārike, Ngöbökwe nieba ietre. 6 Ne aisetē nitre rababa ja tare nike tröda kisete, ni ye abko tö rabadi krütai jötrö, akwa rabadi krüte ñakare.

7 Angwane tröda nitre mikaka bren ye abko bā krörö: mdā mikata biare ngwandre rübtā, ye kwrere jire bā rababa amne, dokwābti bāsi korona orore kwrerekwrere nāma angwane, ngwäre bā rababa ni ngwäre kwrere. 8 Mdakäre abko, dokwā drüen rababa tuen nga meri dokwā drüen kwrere tie amne tu rababa tuen kri krübāte lion tu kwrerekwrere. 9 Amne jändrän ribi ribi jiero kwrerekwrere nāma mikani mätrābtā ngibiakäre rüe ngāniene amne, kareta krati krübāte jākāta niken mdā-kwe rübtā ngöta nebe krikri, ye kwrere jire tröda ye ngike ngö rababa ruen nikenkā kāinta. 10 Erere arato, tröda ye abko niretu aibe rababa tuen kübarate dibe kübara kwrerekwrere. Tröda kübara ye abko di rababa ni mikakrā bren jume sō krārike. 11 Angwane üai kāmē tā dānkienē Kā Timonbti abko tā tröda ye

dänkiene. Ūai káme trōda dänkiene ye abko kädianta Abadón hebreore amne Apolión griegore. Ye abko Ni Gakaka nieta.

12 Kukwe tare kri krübäte jatadre ketamä niebare mü kri-kwe abko erere trōda ye köböite kukwe tare rikaba bati káne ta, akwa kukwe tare kri tā ketebu mda.

13 Yebti angele ni tikäre kākwe drü jūkaba angwane, ñukwä grä orore kri ngwäri rä bāne kukwakrä Ngöböye nāma Ngöbö ngwärecri, yebtä jändrän kroture kräbkä nāma abko te ni kukwei jaraba tie. **14** Angwane angele ni ti kisete drü nāma, ye ie ni kukwei kākwe nieba krörö: Angele nibkä tā mākāninte Nō Eufates kanti ye tikete, nieba kwe. **15** Ye erere bkänä, ñänä okwä nuäi, köbö mden te amne sō mdenbtä amne kē mdenbtä angele nibkä ye rabadre tikaninte abko nāma mikanintbe, ye erere angele rababa tikaninte abko kākwe ni kāmikadre ketamä temen, abkokäre rababa tikaninte. **16** Angwane nitre rükä nāma näin mdäbti mdäbti abko 200,000,000 nieba kore abko ni kukwei jaraba tie.

17 Ye ngwane abko, bäsi köböre kwrere Ngöbökwē mdä mikaba tuare tie angwane, nitre nāma näin mdä yebti abko jändrän ribi ribi nāma mikani ja mäträbti kwetre ja ngibiakäre rüe ngāniene. Jändrän ye abko bā rababa tain ñukwä jutra kwrere, bā mire drüne amne bā nāma sübrüre asufre kwrere

abko nāma kitani jabtä kwetre. Mdakäre abko, lion krübäte dokwä, ye kwrere jire mdä ye dokwä rababa tuen tie angwane, mdä ye kadate abko ñukwä jutra, ngübü amne asufre rababa betekä. **18** Ñukwä jutra, ngübü amne asufre rababa betekä mdä kadate ye abko kākwe ni ketamä kē temen nebtä nūnanka Ngöbö rüere kāmikaba, **19** ñobtä ñan angwane mdä ye abko di rababa kadate amne kübarate ni kāmikakrä. Mdä ye abko kübara raba-ba tbi kwrere abko bti rababa ni kwete amne rababa ni kāmike arato.

20 Akwa ni mda mda rababa nire ja tare nika ye näire abko kākwe kukwe kāmekāme Ngöbö rüere ye kitaba ñakare temen, aisete nāma ja mike ngite janknu abko krörö: ūai káme gibaakaba ñakare kwetre. Mdakäre abko oro, plata, bronse, jä amne kri sribebare ngöbö ngwarbere abko ie kē tuen ñakare amne ni kukwei ruen ñakare ie amne dikekä ñakare abko mikaba ütiä-te janknu kwetre arato. **21** Mda-käre abko, nitre ye nāma ni kāmike, ye erere tā nuene janknu amne, kwra neme ñakare ietre amne, ja mika gure bati bati neme ñakare ietre amne tā gore janknu arato.

Angele kākwe täräkwata chi biani Juanye

10 **1** Yebti angele mda bäri dite jataba kē känbti timonkwäre mütate, btä ti okwä rababa. Angwane angele ye abko

dokwäbti kainta mrütrā nāma amne, ngwäre abko rababa trä ngitiekä ñänä trä kwrere amne, ngüre abko rababa tuen ürä kri ñukwä jutra kwrere. **2** Angwane angele ye abko nāma näin täräkwata chi metaninte ngwena kisete. Angele ye abko kākwe ngoto küde ruenkri mikaba mrenbti amne ngoto küde ngebe-rekri abko mikaba dobo nōtabti jate. **3** Bti lion tā ngwāne krikri ja dibti, ye kwrere jire angele ye kākwe ngrateba kri ja dibti angwane, unsuni krä kükü ngö rababa ruen tie. **4** Unsuni krä kükü kukwei kākwe kukwe nieba, ye ti rikabara tike täräbtä angwane, ni kukwei rababa ruen kē känbti tie, kākwe nieba krörö: Unsuni kukwei nibi krä kükü kākwe dre nini ye tuemetre tie-be. Makwe ñan tika täräbtä abko ni kukwei jaraba kore tie. **5** Angwane tikwe angele tuaba ngoto mike mrenbti amne dobo nōtabti jate, angele ye ara kākwe kise ruenkri kakaba kän amne kukwe niedi kwe abko kukwe era erere bā mikakäre, **6** bti nieba krörö kwe: Ngöbö Nūnanka Käre-käre amne Ngöbö kē kän, kē temen dātekä ara kākwe mren dātebare amne jändrän jökrä tā te dātekä, Ngöbö ye kābti ti bike kukwe era erere niere krörö: iNgöbökwē ñan kē ngibiadi jire chi mda! **7** Akwa angele ni kükükäre kākwe drü jūkadi angwane, batibe kukwe kaibe tiebe Ngöbö-kwe ye rabadi bare tāte jökrä, Ngöbökwē niebare niara kukwei niekē jökräye ye kwrere.

8 Angwane ni kukwei jaraba krire kē känbti tie ye kākwe niebata krörö mda tie: Angele tā nūnaninkä amne ngoto kwärä tā mrenbti amne ngoto kwärä abko tā dobo nōtabti jate abko täräkwata chi metaninte tā kisete kwe, ye nän käre ie, nieba kwe tie. **9** Ye erere ti rikaba kākwe nieba krörö angele yeye:

Täräkwata chi tā ma kisete, ye ngwen tie, tikwe nieba ie.

Angwane angele ye kākwe nieba mda tie:

Täräkwata ne, amne kweta makwe. Täräkwata ye bānān rabadi mane munkö kwrere ma kadate, akwa ma bülete abko bānān rabadi kwaka, nieba kwe tie.

10 Ye erere bkänä, täräkwata chi nāma angele kisete, ye tikwe dianba kisete, bti tikwe kwetaba. Angwane bānān rababa mane munkö kwrere ti kadate, akwa täräkwata ye rikaba mate ti teri angwane, bānān rababa kwaka. **11** Angwane nieba krörö mda kwe tie: Mtare nitre juta kabre te amne nitre kukwei bātākā ngwarbe amne, nitre nūnanka kē keta-reketare te amne nitre gobranka gobranka, yebtä makwe Ngöbö kukwei nieta btin mda abko nieba kore kwe tie.

Ni nibu Ngöbö kukwei niekē

11 **1** Yebti angelekwe krito bäsi nörä kroko kwrere bianba kē ñākäkrä tie, kākwe nieba krörö tie:

Ju blitakrä Ngöböbe amne ñukwä grä, ye nän ñäke amne ni

nibe tā Ngöbö käikitekä yete, ye makwe tan jökrä. 2 Akwa kä mikani jenena nitre ñakare israelitarekrä ju blitakrä Ngöböbe kanti, ye abko makwe ñan ñäkä, ñobtä ñan angwane nitre ñakare israelitare, ie kä ye bianina. Sö gre ketebu bti krobu niaratre käkwe rätädi jökrä juta deme Jerusalén yebti, mikakäre ja tare nike.

3 Angwane tikwe ni juandi nibu abko käkwe blitadi tikrä. Tikwe ja di biandi ietre amne niaratre rikadi Ngöbö kukwei niere köbö 1,260. Ye abko, nitre Ngöbö kukwei niekä kirakira nämane dän jüräre kite jabtä, ye kwrere nitre ye käkwe dän jüräre kitadi jabtä. 4 Ni nibu ye abko tä olibo krie dobu kwrere amne ñotra grä krobu kwrere tä kä temenbtä ni Dänkien ngwäreki. 5 Nane ni mda mda tö rabadre niaratre nibu ye mikai bren angwane, niaratre kukwei tä betekä ñukwä jutra kwrere kadate käkwe rüe kukwadre jökrä. Ne aisete nire nire tö mikai bren abko gatadre jökrä kore. 6 Mda-käre abko nitre nibu ye tä näin Ngöbö kukwei niere angwane, niaratre di tärä kä mikakrä töre, ñü ñan räkandre jire chi temen abkokäre. Erere di tärä ñö jökrä kwitakrä däräre amne tö rabadre ni mikai bren jume bätäkä ngwarbe, ye erere di tärä ni mikakrä ja tare nike bren bätäkä ngwarbe kisete arato.

7 Akwa nitre nibu ye käkwe blitadi ünän jökrä Ngöbökrä angwane, ni bä jändrän kri

krübäte kwrere abko di Satana-kri, aisete tä Kä Timonbti abko jatadi rüre nitre nibu ye rüre, bti ni jändrän krübäte kwrere ye käkwe niaratre nibu ganaindi kwäräbe amne kämikadi kwe.

8 Angwane juta ütiäte kri Jerusalén, kanti ni Dänkien müre keta-ni krusobtä, juta ye kanti nitre nibu ye ngwäkä rabadi kitanin-tbe tementa ji ngrabare. Juta kri ye mden abko kädianta Sodoma amne Egipto arato, nitre nünanka juta yete tä nüne diän diän bä mikakrä. 9 Angwane köbömä bti ötare ni kä jökräbti temen, ni kukwe bätäkä ngwarbe amne ni bätäkä ngwarbe te käkwe nitre nibu ye ngwäkä tuadi amne ñan doboi mikadre niedi kwetre.

10 Angwane nitre nibu kämikani ye abko käi rabadi nuäre nitre nünanka Ngöbö rüre btä, käkwe jändrän biandi ngwarbe jae kwäräkäre ni kä ngwiankäre nuäre jabtä, ñobtä ñan angwane nitre nibu Ngöbö kukwei niekä ye abko nämane ni nünanka Ngöbö rüre kä nebtä mike ja tare nike krübäte, aisete kämikani angwane, käi rabadi nuäre btäre.

11 Akwa yebti kä rikaba köbömä bti ötare ta angwane, Ngöbökwere nitre nibu ye mikabata nire amne rababa takänintbe krö. Ni jökrä käkwe tuaba nüketa nire abko rababa nekwe-tekä krübäte. 12 Angwane ni nibu ye ie ni kukwei jaraba kri kä käinbti, käkwe nieba krörö ietre: Mun jakwe kä käinbti nete, nieba kwe ietre. Ye

btäräbe rikaba müte käin amne rüe käkwe tuaba jökrä niken kä käinbti.

13 Ye btäräbe dobo rababa nakaenkä kri krübäte. Dobo rababa nakaenkä, ye kisete abko juta Jerusalén nämä ñäkä-nintbe keta jätä abko keteti rikaba ngwarbe temen amne ni kämikaba mili krä kükü dobo yekwe arato. Angwane nitre ruäre nämä nire abko btä kä jürä rababa krübäte amne Ngöbö kä käinbti se käikitakaba kwetre.

14 Ye kwrere kukwe tare krübäte abko rikaba bobu ta, akwa kukwe tare ketamäkäre abko kebera nuke mda.

Angelekwe drü krä kükükäre jükani

15 Yebti angele ni tikäre käkwe drü jükaba angwane, nitre kukwei rababa ruen krikri ja dibti kä käinbti, kä rababa niere:

Ni Dänkien Ngöbö amne Jesu Dianinkä Ngöbökwere abko kitera gobrane ni ngätäite.

Niaratrekwe gobrandi kärekäre, rababa niere.

16 Angwane nitre unbreni gre bti nibkä nämä takänintbe Ngöbö ngwäreki kürä gobrankrä kwekwebti rikaba, rababa ja okokrä mike nebe dobobtä temen Ngöbö mikakäre ütiäte jae amne rababa Ngöbö käikitekä, 17 kä rababa niere krörö:

Ni Dänkien Ngöbö, ma di kri jändrän jökrä bti ta amne ma tä kärekäre.

Nunta kuin niere mae, ñobtä ñan angwane ma di kribti ma kitera gobrane ni ngätäite.

18 Nitre kä jökräbti temen tä nüne ma rüre abko moto romon krübäte makrä, akwa makwe kukwe ükarete ni krütani kräke, mikakäre ja ngie nuen abko käi nura.

Amne nitre sribikä makwe käta ma kukwei niere, ye abko ie ma kitera sribi ütiä bien.

Erere arato, ni ütiäte krikri ya, o ni bobre bobre ütiäte ñakare, akwa tä ma käikitekä, ye abko juta deme makwe, ye ie makwe sribi ütiä biandi.

Amne nire nire käta kä temen ne juen ngwarbe abko makwe juandi ngwarbe arato,

abko nitre unbreni unbreni rababa niere.

19 Angwane ju blitakrä Ngöböbe nämä kä käinbti abko jukwe tikaba amne ju yete abko kaja nämä, btä ti okwä rababa. Kaja ye abko te kukwe ükaninte Ngöbökwere nitre israelitabe abko nämä ükani abko btä ti okwä rababa. Angwane mera trä rababa, kä ngö rababa ruen amne unsuni ngö rababa amne dobo rababa nakaenkä amne ñü järe järe

rababa näkäen kabre temen ti okwäbti.

Meri amne mökata kri

12 ¹ Ye btäräbe Ngöbökwe jändrän kuin, ütiäte kri bā mikaba kā käinbti abko tikwe tuaba. Ye abko, Ngöbö-kwe dre nuendi bā mikaba abko krörö: Meri iti kätä juta era metre Ngöbökwe bā mike nāma kā käinbti abko btā nānā trā nāma dān kwrere amne, sō abko nāma niara ngoto tāni. Erere arato, korona nāma niara dokwäbti abko btā muke bā nāma kwā jätäbti kubu. ² Meri ye ñakare mobe bren kwe kise-te, aiseite jataba ja ngibiare amne rababa ngrente krikri be ja ngibiabtā.

³ Yebti jändrän mdara jire rababa kā käinbti sete abko mökata kri krübäte bā tain rababa tuen tie. Mökata ye abko Satana ara bā mika nāma. Mökata ye abko dokwā kwā kükü amne korona nāma mikani dokwā kwatirekwatire bti amne krotu krā jätā ie, niara bāri dite bā mikakrā. ⁴ Angwane muke kā käinbti^e se nāma ñäkänintbe ketamā abko mökata ye kākwe muke sökakaba keteti ja kübara-bti, bti kitaba timon kwe kā temen nebtā. Abti meri nāma ja ngibiare amne ngäbäkre dāredre kwe abko mökata ye tō rababa kwetai jötrö kām, abkokäre raba-ba nūnaninkā meri kanti yete.

⁵ Angwane ngäbäkre dāreba brare meri yekwe abko Jesu Dianinkā Ngöbökwe bā mikata. Ngäbäkre ye abko kākwe gobrandi ja di kribti juta jökräbti, kākwe juta jökrā mikadi ja ngoto tāni. Akwa ngäbäkre ye dāreba angwane, batibe Ngöbökwe dianinkā jene-na mökata ngāniene amne jārī-kaba nebe Ngöbö kanti, kürā gobrankrā Ngöbökwe ye kanti gobrane Ngöbö ben gwaire.

⁶ Akwa meri ngäbäkre ngibiaka ye abko gitiaba kā kaibete. Ngöbökwe kā ūkaninante biare krä-ke, kanti gitiaba. Ye kanti abko Ngöbökwe bukadre köbö 1,260 abkokäre gitiaba yete.

⁷ Yebti rüba krörö mda kā käinbti: angele Miguel btā angele mda mda kākwe rüba mökata amne angele ūai kām kwekwe rüere. ⁸ Akwa niaratre abko di ñakare ganainkrā, aiseite angele Miguel btā angele mda mda ye kākwe mökata ye ganainba kwäräbe, aiseite kā ñan rababa mda niaratrekrā nūnankrā kā käinbti. ⁹ Abtā mökata kri kadekata tbi kira, arabe kadekata Diablu amne Satana tā nāin ni ngökō kwati kā jökräbti temen, ñan rikadre ji Ngöbökwebti abkokäre. Mökata ye btā angele ūai kām kwekwe ben kitaba jökrā timon nūke kā nebtā. ¹⁰ Angwane ni kukwei jaraba kri ja dibtī kā käinbti tie, kā rababa niere krörö:

Kā ni dīantarikrā nūra.

^e 12.4 Muke ye abko angele ngökani Satanakwe Ngöbö rüere bā mikata nütüta.

Ngöbö nikwe di kri kitera gobrane amne, Ni Dianinkā Ngöbökwe abko nūra gobrane arato, ñobtä ñan angwane dibire rare ni mrākā rüe Satana kā nāmāne ni mrākā tōdekaka Jesubti kite ngise Ngöbö nikwe ngwäreki abko kitaninkāra kā käin bäre mento nūke kā temen nebtā.

¹¹ Ni Kordero kwrere dārie ianinte krusobtä ni ngite diankakäre mento btäre, ye köböire ni mrākā tōdekaka niarabti kākwe Satana ganainbare. Erere arato, ni mrākā kākwe kukwe kuin Jesubtä nieba angwane, ja kwata namani ruentari tare ñakare ietre, kākwe kā jürā ngwiani ñakare jabtā, aiseite nāmāne biare ngataen kukwe kuin niebtā.

Yebti Satana ganainbare kwetre arato.

¹² Ne aiseite mun nūnanka kā käinbti kā ngwen nuäre jabtā munkwe.

Akwa aingwaree mun nūnanka kā temenbtā amne mun nūnanka kā butubti mrente.

Mun ye abko bobre jakān, ñobtä ñan angwane kā kitera neme braibe diablu ye rükäre Ngöbö rüere, aiseite mātā kri

mun nūnanka kā temenbtā ye rüere, abko ni kukwei rababa ruen tie.

¹³ Mökata kitaba timon kā temen nebtā angwane, meri kākwe ngäbäkre ngibiabare ye jiebtī mökata rikaba kisere mikakäre ja tare nīke. ¹⁴ Akwa meri ye abko gitiadreta kā kaibete tbi ngāniene, abkokäre mü kri ngike kwrere Ngöbökwe bianba ie rikakakrā, ye erere bkānā meri ye gitiabata mobe tbi ye ngāniene. Ye kanti Ngöbökwe ngibiaba kā komā bti ötäre. ¹⁵ Angwane tbi ye kākwe ñō yaiba kabre meri ye rüere mda, ñō ye abko rabadre kri, kā rikadre meri ye ngwena nguse, abkokäre yaiba kwe. ¹⁶ Akwa dobo temen ye kākwe meri ye die mikaba amne, ñō kri yaiba mökata kwe, ye dobokwe ñakaba jökrā, aiseite mökata kwe meri kāmikani ñakare.

¹⁷ Yebtä abko mökata ye mātā rababa kri krübäte meri yebtä angwane, rikaba rüre meri ye bkūn mda mda rüere. Meri bkūn mda mda abko ni Ngöbö kukwei mikaka tāte era metre amne ni blitaka Jesu kräke, ye rüere mökata rikaba rüre.

Ni jändrän kri krübäte kwrere jataba mrente käin

13 ¹ Yebti mökata rababa nūnaninkā mren körä-bti. Yebti ni jändrän kri krübäte kwrere jire abko jataba mrente käin ti okwäbti mda. Ni ye abko dokwā kwā kükü amne krotu krā jätā ie, niara bāri dite bā mikakrā, btā ti okwā rababa.

Angwane kukwe diän taretare tikani Ngöbö rüere nämä keta-ninkä kwati dokwä kwatirekwa-tire btä amne korona nämä mikani krotu kratirekratire btä abko tikwe tuaba. **2** Ni jändrän kri krübäte kwrere tikwe tuaba, ye abko bä rababa tuen kwra leopardo kwrere tie amne ngoto abko rababa tuen oso ngoto kri kwrere tie amne kada abko rababa tuen krübäte lion kada kwrere tie. Ni ye abko ie möka-ta kākwe ja di bianba kri go-brankrä nibtä. **3** Ni jändrän kri krübäte kwrere ye abko träin kri dokwä kwatibtä abko kisete gatadre, akwa träin ye abko rababa quinta ie, bä rababa tuen tie. Yebtä abko ni jökrä ñan tōi rababa krütare amne ni jökrä rikaba niara jiebtä. **4** Angwane mökata kākwe ja di bianba ni jändrän kri krübäte kwrere ie. Yebtä abko ni jökrä rababa mökata ye mike ütiäte Ngöbö kwrere. Erere arato, ni jändrän kri krübäte kwrere ye mika rababa ütiäte kwetre arato, kä rababa niere krörö: Ni jändrän kri krübäte kwrere tä nete, ne kwrere ni ñakare jire mda. ¿Nirekwe rüdre ni ne kwrere rüere se? rababa niere.

5 Mdakäre abko, ni jändrän kri krübäte kwrere ye abko ie ja di bianba kri kä nebtä sö gre ketebu bti krobu. Erere arato, niarakwe bikadre kri, kākwe ñākādre kāmekāme Ngöbö rüere, abkokäre kä bianba kore ie. **6** Ye erere bkänä, ni ye kākwe ñākāba kāmekāme

krübäte Ngöbö rüere amne kä käinta, kanti Ngöböta nüne, ye rüere ñākāba diän diän kwe. Erere arato, nitre nünanka kä käinbti, ye rüere ñākāba kwe. **7** Erere arato, juta deme Ngöbökwere rüere rüdre kwe, ye ganaindre kwäräbe kwe amne kāmikadre kwe, abkokäre kä bianba ie rükäre bentre. Erere arato, ni bätäkä ngwarbe amne juta bätäkä ngwarbe amne ni kukwe bätäkä ngwarbe amne kä bätäkä ngwarbe bti rabadre gobrane, abkokäre ja di bianba ie arato. **8** Angwane Ngöbö ngämi kä ne dätäre, känenkri ni Kordero kwrere nämāne mikani biare kāmikadre ni mdaye ni jökrä kräke. Ye abko, nire nire ñakare jen niarakwe abko kä tä tikani ñakare tärä ni nünandi kärekäre mikakrä gare yebtä, ni ye abko kākwe ni jändrän kri krübäte kwrere mikadi ütiäte jae Ngöbö kwrere.

9 Nire nire olo tärä abko kākwe olo ketate kukwe neye:

10 Nire nire jirikadre ngite tödekabtä Jesubti, ye erere jänäin ngite. Nire nire kāmikadre ngitrabti tödekabtä Jesubti, ye erere kāmikadi ngitrabti.

Kukwe rakadikä kore angwane, juta deme Ngöbökwere kākwe nünandrekä dite jabtä bätärekä ja täritäri amne Jesu rükandrete ñakare kwetre, akwa tödekadre kwatibe Jesubti janknu.

Ni jändrän krübäte kwrere mda jatani dobote käin

11 Yebti ni mdara jire jataba dobote käin, akwa niara abko ni jändrän krübäte kwrere jataba, rababa tuen tie. Ni ye abko krotu krobu ie abko rababa tuen korde-ro krotu kwrere tie, akwa ñan ñākāba jāme kordero kwrere kwe, akwa rababa ñāke mökata kwrere. **12** Amne ni jändrän kri krübäte kane ye di rababa jökrä kwe, kä rababa sribire ni kane ye diäre. Ni jändrän kri krübäte kane abko träin kri dokwä kwatibtä abko kisete gatadre akwa namaninta quinta ie, ye kräke ni mda ye rababa sribire, kä rababa ni kane ye mikamna ütiäte Ngöbö kwrere ni jökrä kä nebtäye. **13** Erere arato, ni ye rababa sribi kri ñan tuabare nuene, kä rababa ñukwä kä käinbti mike kite timonkwäre ni mda mda okwä-bti, niara di kri Ngöbö kwrere abko ni jökrä kākwe nütüdre, abkokäre sribi kri ñan tuabare nuenbare kore kwe ni ngökakäre. **14** Angwane ni jändrän kri krübäte kwrere nämā kane, ye mikakäre ütiäte, ni mda ye rababa sribi kri ñan tuabare nuene. Yebtä abko ni kwati ngökaba kwe. Erere arato, ni jändrän kri krübäte kwrere abko dokwä kwati tikaninkä ngitrabti kāmikakäre, akwa träin namaninta quinta ie amne namani nüne janknu, ye bä sribemna kwe mikakäre ütiäte Ngöbö kwrere, ye erere ni jökrä kākwe sribeba-re. **15** Angwane ni jändrän

krübäte kwrere nibukäre, ie ja di bianba bä ye mikakrä nire abko erere nuenba kwe. Amne nire nire kākwe ñan ni kane ye bä mikadre ütiäte jae Ngöbö kwrere abko kāmikadre kwe abko jändrän bä nämā niere.

16 Mdakäre abko, ni ngwarbe amne ni ütiäte, ni ngwian bkänkä krikri amne ni bobre bobre, ni klaboré ñakare amne ni klaboré abko btä ni jändrän kri krübäte kwrere nämā kane ye kä tikadre ni kise ruenkri btä o ni okobtä abko ni mda ye kākwe nieba abko erere mikani nuene.

17 Akwa nire nire btä ni jändrän kri krübäte kwrere nämā kane ye kä nämā tikani ñakare, ni ye ñan rabadre jändrän rürümoine amne jändrän kökö jae. Ni käi ye abko ni jändrän kri krübäte kä o niara kä tikani kö okwä jändrän tankrābti. **18** Amne kö okwä jändrän tankrä, bti ni jändrän kri krübäte kwrere käita tikani, ye abko nire nire töbtä aibe ie ni ye raba nuke gare. Kö okwä jändrän tankrä yebti, aiseti ni ye abko kä tikata kö okwä jändrän tankrābti abko 666.

Ni 144,000 abko Ngöbökwere mikani jenena jakrä

14 **1** Yebti ni Kordero kwrere nämā nünaninkä ngitio Siónbti, btä ti okwä rababa angwane, ni ye ben abko ni mda nämā 144,000. Angwane nitre okobtä Kordero ye kä nämā tikani amne Kordero rün kä nämā tikani arato niaratre nämā nitre ye bkāne bä mikakrä

abko rababa tuen tie. **2** Yebti ñö ngöta nebe kri, ye kwrere jire kä ngö rababa ruen kä käinbti tie. Erere arato, unsuni ngöta nebe krikri ja dibti, ye kwrere kä ngö rababa ruen tie. Mdakäre abko, ni kwati rababa arpa kabre täke gwaire jökrä abko kwrere jire kä ngö rababa ruen tie. **3** Angwane kürä gobrankrä Ngöbökwé ye ngwärekwé nitre 144,000 rababa ka btin niere. Erere arato, jändrän kräbkä nämä kürä bare temen ye ngwärekwé amne nitre unbre unbre ngwärekwé ka btin ye nieba kwetre arato. Akwa ka btin, yebtä ni mda mda ñan rababa töi ngitie-kä jire chi amne nitre 144,000 kökanintarita Ngöbökwé jakrä, ye aibe ie ka btin ye rababa nuke gare. **4** Nitre ye abko, ni deme ja mike gure ñakare meribe, ye kwrere jire nitre ye käkwe ja ngibiabare deme, käkwe ngöbö ngwarbe ngwarbe mikani ütiäte ñakare jae. Ni Kordero kwrere nämä niken mdente ere-re abko jiebtí niaratre nämä niken. Erere arato, ni Kordero kwrere krütani krusobtä angwane, ni jökrä ngätäite niarakwe ni ye kökani Ngöbökrä, bti nura ngwä ötata käne, ye bianta ngwarbe Ngöböye kuin niekäre ie, ye kwrere niaratre nämä biani Ngöböye amne ni Kordero kwrereye kuin niekäre ietre. **5** Amne blitabare era metre kwetre Ngöbökrä amne ni mda ngökani ñakare jire chi kwetre, aiseite ni mda mda ñan rababa kite ngise jire chi. Nitre ye

mden abko ie ka btin rababa nuke gare.


6 Yebti tikwe angele mdara jire tuaba abko rababa nikenkä käinta sete. Angele ye abko nämä Ngöbö kukwei kuin käre-käre ngwena niedre ni jökrä nünanka Ngöbö rüere kä temenbtä yeye. Ye mden kisete, ni kä jökräbti temen amne ni bätäkä ngwarbe amne ni kukwe bätäkä ngwarbe amne ni nünanka juta kwatirekwatire te abko kräke angele ye nämä Ngöbö kukwei kuin ye ngwena, **7** kä rababa niere krörö ja dibti: Ngöbö jürä ngwian jabtä munkwe amne nia-ra käikitaka munkwe, ñobtä ñan angwane niarakwe kukwe ükarete ni kräke mikakäre ja ngie nuen abko käi nura amne, Ngöbö kä käinbti btä kä tementa dätekwä amne Ngöbö mren dätekwä btä ñö dätekwä, Ngöbö ye abko mika ütiäte munkwe abko angele ye rababa niere kore ti okwäbti.

8 Yebti angele jataba nibukäre mda abko käkwe juta Roma bä mikaba juta Babilonia kwrere, kä jataba niere krörö: Meri bti kä ngwarbe käta ni brare brare näkwite ja mikakäre ngite, ye kwrere jire nitre nünanka juta kri Babilonia käkwe ni kwati kä jökräbti temen näkwitani, aiseite ni kwati töi nikwitani jame käkwe ja mikani ngite ben Ngöbö rüere, akwa juta kri ye abko nikira ngwarbe jökrä, angele ye rababa niere.

9 Yebti angele jataba nimäkäre mda. Angele ye abko jataba ñäke ja dibti, kä jataba niere

krörö: Ni jändrän kri krübäte kwrere arabe bä sribebare, ye nire nire käkwe mikadre ütiäte ngöbö kwrere jae amne nire nire käkwe ja tuadremetre ni ye kä tike ja okobtä o ja kisebtä, **10** nitre ye abko btä Ngöbö mätä rabadi kri krübäte abko uba döi kwaka ñata kwrere jire rabadi kräke, ñobtä ñan angwane uba döi ngätäre kwaka ye kwrere jire Ngöbö mätä nibi, aiseite nitre ye abko käkwe ja tare nikadi kri krübäte ñukwä jutrate amne asufrete angele deme Ngöbökwé ngwärekwé amne ni Kordero kwrere ngwärekwé arato. **11** Ne aiseite, nitre ni jändrän kri krübäte kwrere mikaka ütiäte jae amne ni ye arabe bä sribebare abko nire nire käkwe kä tikani jabtä abko käkwe ja tare nikadi kärekäre dibire rare, aiseite kä rabadi ñakare jadükakrä ietre. **12** Ngöbökwé ni ye mikadre ja tare nike kore, kukwe nebtä abko juta deme Ngöbökwé tödekaka Jesubti, käta Ngöbö kukwei mike täte ye abko käkwe ja die mikadre nüne dite Ngöbökrä. **13** Yebti ni kukwei jaraba mda kä käinbti tie, käkwe nieba krörö tie: Tärä tike krörö: Mtare mentokwäre nire nire tödekaka ni Dänkienbti tä krüte, ni yebtä kä rabadi nuäre amne Ngöbökwé ja di biandi ie.

Jän, abko kore era metre nienta Ngöbö Üaikwe, ñobtä ñan angwane nitre ye käkwe jadükadi, ñan sribidre mda kwe, amne sribibare kuin kwetre, ye



*Ngitra tänene bä kore
(Apocalipsis 14.14)*

abko Ngöbökwé ütiä biandi ietre abko tike kore täräbtä, nieba kwe tie.

Ni jökrä ükaninkrö kukwe ükatekäre kräke

14 Yebti tikwe nikraba mda angwane, müta ngwen bürere, btä ti okwä rababa. Angwane müta yebti abko ni iti Ni Kä Nebtä Ngobo kwrere rababa tuen tākānintbe tie. Angwane korona orore nämä dokwäbti amne ngitra tänene tu grine ngwian nämä kisete kwe. **15** Ye btäräbe ju blitakrä Ngöböbe kä käinbti te angele nämä abko jataba ju bare käkwe ñäkäba ja dibti ni nämä tākānintbe mütabti yeye, käkwe nieba krörö ie: Ni kä jökräbti abko nura ngwä nena tain jökrä kwrere, aiseite nura ngwä öta käi nura, aiseite ngitra tänene tä ma kisete, yebti nura ye tikekä, bti makwe ngwä öta, erere makwe ni jökrä ükärö Ngöbökrä, nieba kwe ie. **16** Ye erere bkänä, ni nämä tākānintbe mütabti käkwe ni jökrä ükaninkrö Ngöbökrä ye bä mikakäre, ni ye käkwe ngitra mnianteba nura tikakakrä kä

temen nebtä amne, ni jökrä ükakra öba kwe kä nebtä.

17 Abti angele mdara jire nämä Ngöbö ngwäre kri ju blitakrä Ngöböbe te kä käinbti, angele ye abko nämä ngitra tänene tu grine ngwena kisete arato. **18** Angwane ñukwä grä kri ngwäri mnü rä bäne kukwakrä Ngöböye, ye kanti angele mdara jire nämä. Angele ye abko di nämä ñukwä jutrabti. Angele ye abko kākwe ñākāba ja dibti angele ngitra tänene ngwianka kisete yeye angwane, ni jökrä nünanka Ngöbö rüere bā mikaba uba kwrere kwe, kākwe nieba krörö ie: Uba nena tain btä amne kä uba ngwä ötakrä nūra, aisete ngitra ye mniente kä temenbtä amne, makwe uba ngwä öta küdekrä ngöi ngöi, nieba kwe. **19** Ye erere bkänä, angele ye kākwe ngitra tänene tu grine ye mnianteba kä temen nebtä angwane, uba ngwä tikakaba jökrä kwe uba kökräibtä. Yebti jändrän kri uba tükakakrä, te uba kitaba jökrä kwe tükakakrä. Uba tükarekä ngotobti, ne abko Ngöbö mätä kri nitre nünanka niara rüere btä bā mikata, erere niarakwe gadite jökrä abko bā mikata kore. **20** Angwane uba ye abko tükakaba juta Jerusalén bare mento, akwa jändrän uba tükakakrä te uba tükakaba, ye kanti däri aibe rababa betekä kabre krübäte. Däri rababa neen kwata kri temen kilometro sien-to krämä jire amne rababa mate mdä kadabtä rababa tuen tie.

Angele ni kükü jändrän taretare ngwianka ni rüere

15 1 Yebti jändrän mda kri-kri rakadrekä abko bā rababa kä käinbti abko btä ti ñan töi rababa krütare mda abko krörö: Ngöbö mätä kri ye abko rabadre bare täte jökrä nitre nünanka niara rüere btä abko angele ni kükü nämä näin jändrän taretare keta kükü mrä ngwena kisete, ni nünanka Ngöbö rüere mikakäre ja tare nike kri abko rababa tuen tie. **2** Mdakäre abko, jändrän mdara jire tuaba tikwe abko bā rababa tuen mren bidriore kwere abko nämä mritani ñukwä jutrobe ketetibe rababa tuen tie. Mren bidriore ye kanti abko nitre nämä nünaninkä arpa keta-ninte kisetekisete rababa tuen tie. Ni jändrän kri krübäte kwere amne bā dätebare, ye nire nire kākwe mikani ñakare ütiäte ngöböre jae kākwe ganainbare kwäräbe amne niara kä tikani ñakare kwetre jabtä amne kö okwä jändrän tankrä ni yekwe abko mikani ñakare kwetre jabtä, ye mden ie Ngöbökwere arpa biani abko nämä kisete tākäkrä Ngöbö käikitakakäre. **3** Moisés, sribikä Ngöbökwere kākwe Faraón ganainbare angwane, ka niebare kwe Ngöbö käikitakakäre, ka ye kwrere niaratre nämä niere amne ni Kordero kākwe ka niebare, ye kwrere abko niaratre nämä niere abko krörö:

Ni Dänkien Ngöbö Di Kri
Jändrän Jökrä Nuenkrä,
makwe jändrän krikri

krübäte nuenbare, ye abko bā nuäre jökrä.

Amne ma abko tä gobrane kärekkäre.

Ma abko era metre amne ji makwe abko kuin metre jökrä.

4 Ni jökrä kākwe ma jürä ngwiandre ni Dänkien.

Erere arato, ni jökrä kākwe ma mikadi ütiäte jae ni Dänkien, ñobtä ñan angwane ma aibe kuin deme amne metre.

Erere arato, ni jökrä jatadi, kākwe ma käikitadikä, ñobtä ñan angwane mata kukwe ükete era metre ni jökrä kräke abko nena gare aisete,

abko nitre ye rababa ka niere kore.

5 Yebti tikwe nikrabata angwane, ju blitakrä Ngöböbe nuäre ngwiandre nämä kä käinbti abko jukwei gitiaba, rababa tuen tie amne, ju yete abko kukwe keta jätä biani nuendre nie Ngöbökwere abko nämä ükani. **6** Angwane ju blitakrä Ngöböbe ye te angele ni kükü nämä abko jataba ju bare. Angeletre ye abko nämä kukwe taretare krübäte nuendre keta kükü Ngöbökwere abko ngwian nämä kisete kwetre. Angeletre ye abko nämä dän merebe trä ngitiekä kädekata lino kitani jabtä te nämä näin amne koria orore nämä kitani ja kötäbti ta kwetre abko jataba tie. **7** Angwane jändrän kräbkä nämä Ngöbö bare temen, jändrän ye krati abko kākwe blato orore te

Ngöbö mätä kri nitre nünanka niara rüere btä nämä mikani abko bianba kwe angele itire itire ie. Ngöbö ye mden tä nüne kärekkäre. **8** Angwane ju blitakrä Ngöböbe nuäre ngwiandre abko te Ngöbö di kri bā rababa abko ngübü aibe rababa gwita temen amne, kukwe tare kri krübäte ngwian nämä angele ni kükükwe ye ngämi niken ta, känenkri ni ñan raba neme jire gwi ju yete, rababa tuen tie.

Blato kwä kükü te Ngöbö mätä kri nämä mikani

16 1 Abti ju blitakrä Ngöböbe te ni kukwei rababa ruen kri ja dibti tie, kä rababa niere angele ni küküye: Ngöbö mätä kri tä mikani blato kwä küküte, ye mun nän iente kä temenbtä amne ni nünanka kä temenbtä sebti, nieba kore angeletre. **2** Ye kwrere bkänä, angele rikaba iti käne kākwe Ngöbö mätä kri nämä blatote ye ianteba kä temen yebti angwane, ni jökrä, btä ni jändrän kri krübäte kwrere ye kä nämä tikani amne, ni jändrän kri krübäte kwrere abko bā sribebare, ye nire nire nämä mike ütiäte ngöböre jae, nitre ye abko kwata rababa ngütüete käme jökrä ietre abko bā rababa käme amne rababa tare krübäte ietre.

3 Yebti angele nibukäre kākwe Ngöbö mätä kri nämä blato te ye ianteba mrenbti angwane, ñö mrente ye rikwitaba därire jökrä. Däri ye abko rikrakaba ribi ribi bäsi ni kämikata

angwane, ni dārie tā nikrenkā ye kwrere jire mren nōi rababa, aiseite jändrän nūnanka mrente mrente ye gataba jire jōkrā.

4 Yebti angele nimākāre kākwe Ngōbō mātā kri nāma blato- te ye ianteba nō krikribti amne nō okwā kiakiabti. Angwane nō amne nō okwā ye rikwitaba dārie jōkrā arato. 5 Angwane angele mdara jire abko nō ngibiabtikā kukwei jaraba tie, kākwe nieba Ngōbōye:

Ngōbō Deme, ma nāmanena kira kena amne ma tā kāre mtare.

Mata ni mike ja tare nike kore, se abko mata nuene kuin era metre, 6 nōbtā nān angwane nitre nūnanka ma rüere kākwe juta deme makwe kāmikani angwane, niaratre dārie ianinte kabre kā temen nebtā.

Erere arato, nitre ma kukwei niekā dārie ianinte kwetre.

Ye mden ütiäre abko mata dāri bien nādre ietre mtare.

Niaratre kākwe kukwe nuenbare kore, ye mden ütiäre mata nuene kore btātre arato ye. Abko kore se,

nieba angelekwe Ngōbōye.

7 Yebti nitre tōdekaka Jesu- bti müre ketani abko üai nāma nūkwā grā kānti abko kukwei jaraba mda tie, kākwe nieba Ngōbōye: Ni Dänkien Ngōbō Di Kri Jändrän Jōkrā Nuenkrā,

ma abko tā kukwe ükete kuin era metre nitre nūnanka ma rüere krāke, kāta niaratre mike ja tare nike era metre nun dokwäre, rababa niere kore Ngōbōye.

8 Angwane angele nibkākāre kākwe Ngōbō mātā kri nāma blato- te ye ianteba nānānbti angwa- ne, nānā ye ie ja di bianba ni kukwakrā nūkwā kwrere.

9 Angwane nānānkwe ni jōkrā kwata kukwaba tare krübāte angwane, Ngōbō kukwe taretare kri juanka, ye rüere rababa nāke kāmekāme jirekābe mda, akwa kukwe kāmekāme kitaba nākare temen kwetre amne Ngōbō mika- ba ütiäre nākare jire chi kwetre jae.

10 Yebti angele nirikekāre kākwe Ngōbō mātā kri nāma blato- te ye ianteba ni jändrän kri krübāte kwrere nāma gobrane yebti. Angwane kā gobrankrā kwe, ye kānti kā rababa iko jōkrā. Ye ngwane kukwe taretare nakaninkāra nibtā, abtā ni jōkrā rababa ja tare nike kri, kā rababa ja tüdrā kwete be tute ja tare nikabtā. 11 Akwa niaratre nāma- ne ja mike ngite nō nō Ngōbō rüere abko kitaba nākare temen kwetre amne jirekābe rababa ngütüete jōkrā ngrabare, kisete rababa ja tare nike kri krübāte, abtā rababa nāke kāmekāme Ngōbō kā kāinbti se rüere.

12 Yebti angele ni tikāre kākwe Ngōbō mātā kri nāma blato- te ye ianteba nō kri Euftratebti angwane, nitre gobranka btā rükā kwekwe kā driri jatani abko

rikadre kā nōtabti ta, abkokāre nō kri Eufrates ye grōtaba jōkrā.

13 Yebti tikwe jändrän tuaba krörō mda: Mōkata kadate, ni jändrän kri krübāte kwrere ka- date amne ni ngōbō ngwarbe kukwei niekā abko kadatekadate üai kāmē gwre kwrerekwrere jataba komā mentokwäre ti okwābti. 14 Angwane üai kāmē komā bā rababa gwre kwrere ye rababa sribi kri nān tuabare nue- ne abko rikaba nitre gobranka krikri kā jōkrābti temen ükekrō rükāre Ngōbō Di Kri Jändrän Jōkrā Nuenkrā ye rüere. Ye näire Ngōbōkwe rüe ganaindi kwärābe.

15 Angwane ni Dänkien abko kākwe nieba: Ni gokā tā kite batibe, ye kwrere ti jatadita, aiseite munkwe mokre jabti amne nire nire tādī mokrere jabti kākwe ja ngibiadre kukwe kāmē- kāmē Ngōbō rüere ye ngāniene angwane, nān tādre dikekā ni bütire kwrere, abkokāre tā dān ngibiare kuin jōkrā jabtā amne bütiekrā gaidre kri krāke abko nān tuadre ie, abkokāre tā dān ngibiare kuin jakrā, ye abko tādre ja ngibiare kukwe kāmēkāmē Ngōbō rüere ngāniene. Ni ye abko btā kā rabadi nuäre amne Ngōbōkwe ja di biandi ie. Abko kore se, nieba ni Dänkienkwe.

16 Yebti üai kāmē nimā ye kākwe nitre gobranka krikri ükakrōba jōkrā kā kādianta Armagedón hebreore ye kānti rükāre Ngōbō rüere.

17 Angwane angele ni kükü- käre kākwe Ngōbō mātā kri nāma blato- te ye ianteba mürete kānta. Ye btärābe ju blitakrā Ngōbōbe, kānti Ngōbō nāmāne tākānintbe kūrā gobrankrābti, ye kānti ni kukwei rababa kri, kā rababa niere krörō: iJändrän jōkrā nibira bare tāte jōkrā! ni kukwei rababa niere.

18 Angwane mera rababa trä ngitiekā, kā ngō rababa, unsuni ngō rababa krikri krübāte amne dobo jataba nakaenkā abko rababa dobo mike grükekā jō- krā, ye abko ni nükani nüne kā nebtā angwane dobo nān raka- kabare kri krübāte abko erere dobo rakakaba. 19 Dobo raka- kaba kri krübāte ye abko kākwe juta kri Babilonia^f nākānintbe ketamā temen amne ju krikri juta mda mdate rikaba jōkrā temen. Angwane Ngōbō mātā kri bā mikata uba dōi kwaka kwrere jire, bti juta Ba- bilonia mikadre ja ngie nuen kwe ye abko rükabata tōre ie.

20 Angwane kā butu mrente amne kā ngitiore krikri mento- kwäre abko rikaba ngwarbe jōkrā amne rababa tuen nākare mda amne, 21 nū jā kukwān kwrere kā kāinbti rababa nākāen temen nibti. Nū jāre ye abko dābā kilo gre ketebu näre abko rababa nākāen temen. Ngōbō rababa ni mike ja tare nike kri krübāte kore, yebtā abko ni jōkrā rababa nāke kāmekāme Ngōbō rüere.

^f 16.19 Juta Babilonia kāta juta Roma bā mike nütüta.

Meri takänintbe jändrän krübäte yebti

17 1 Abti angele ni kükü kisete Ngöbö mätä kri nāma blatote abko ianteba kwe-tre, angele ye abko iti jataba kākwe nieba krörö tie:

Meri bti kã ngwarbe kri krübäte abko tã takänintbe ñö bätäkã ngwarbe bti, se mikadi ja ngie nuen ñio Ngöbökwẽ abko ti bike mike tuare mae, aisetẽ jakwe tuen, nieba kwe tie. **2** Angwane nitre jreire kã jökrãbti temen kākwe kã kwita kwitaba jabtĩ meri ye ben gwaire. Erere arato, nita nebe dröbare angwane, kãta nebe nenkã ni dokwãbti, ye kwrere jire nitre nünanka kã nebtã dokwãbti kã rababa nenkã, aisetẽ kã rababa ngwarbe bti meri ye kwrere amne kukwe diãn diãn nãmane nuene.

3 Yebti Ngöbö Üai rükaba tãte jökrã tibtä angwane, angele ye rikaba ti ngwena kã kaibete mda. Ye kãnti tikwe meri tuaba iti amne, ni jändrän kri krübäte kwrere bã tain, bti meri ye nãma takänintbe. Ni jändrän kri krübäte kwrere tõi nãma jökrã Ngöbö rüere, aisetẽ kwatabtä kukwe kãmekãme taretare nãma tikani Ngöbö rüere. Mdakãre abko, ni jändrän kri krübäte kwrere dokwã kwã kükü amne krotu krã jätã ie abko bti meri ye nãma.

4 Meri tuaba tikwe ye abko btã dãn ütiãte kri bã mikibare nãma amne dãn tain nãma btã. Erere arato, meri ye kākwe ja dãtebare

kuin jändrän ororebti, jã tuãre-tuãre bti amne perlabtĩ. Meri ye kisete abko baso orore nãma arato. Baso yete abko jändrän kãmekãme Ngöbö rüere btã ni mätä kri Ngöbö rüere amne jändrän ngwarbe kãme nuen nãma niara-kwe kã mikakrã ngwarbe jabtĩ abko nãma basote kwe. Ye abko meri nãma töbike kore amne nãma nüne kore Ngöbö rüere abko bã mikata baso yebtä. **5** Amne meri ye kã nãma tikani krörö okobtä:

MERI NE ABKO NIRE ABKO TÃ
ÜKANI TIEBE.

MERI NE ABKO TÃ JUTA KRI
BABILONIA BÃ MIKE.

MERI JÖKRÃ, BTI KÃ NGWARBE
ABKO NIARA KWRERE, AISETE
DAREBARE NIARAKRI.

AMNE KUKWE KÃME DIÃN DIÃN
NGÖBÖ RÜERE JATANI
NIARAKRI,

abko nãma tikani kore meri ye okobtä. **6** Yebti kãta neme nuãre nibtä dröba kisete, ye kwrere meri yebtä kã nãma nuãre juta deme Ngöbökwẽ ye dãrie kisete, ñobtä ñan angwane niarakwe nitre tödekaka Jesubti kãmikani blitabträ Jesukrã, ye kãĩ ngwian nãma nuãre kwe jabtã abko kisetẽ nãma ni dröbare kwrere tikwe gaba mda.

Angwane meri tuaba tikwe, yebtä ti tõi ñan rababa krütare.

7 Abtä angele ye kākwe nieba krörö tie:

¿Ye ñobtä abko ma ñan tõi nebe krütare meri se tuare ye? Meri se tã kukwe ñio bã mike abko tã kaibe tiebe abko ti bike

niere mae. Ni jändrän kri krübäte kwrere dokwã kwã kükü ie amne krotu krã jätã ie kãta meri se ngwena abko kãta dre bã mike abko ti bike niere mae abko krörö: **8** Ni jändrän kri krübäte kwrere turi makwe, ye abko nãmane nüne kira, akwa mtare tã nüne ñakare mda, akwa jändrän ye abko juan ngãmi ngwarbe Ngöbökwẽ, kãnen-kri nãmane Kã Timonbti abko jatadita kã temen nebtã angwane, Ngöbökwẽ juandi ngwarbe. Angwane Ngöbökwẽ ni dãtebare kira kena, ye ngwane mentokwãre tãrã ni nünanka kãrekãre Ngöböbe mikakrã gare, yebtä nire nire kãita tikani ñakare abko kākwe ni jändrän kri krübäte kwrere ye tuadi angwane, niaratre ñan tõi rabadi krütare ni jändrän kri krübäte kwrere yebtä, ñobtä ñan angwane niara nãmane nüne kira akwa mtare tã nüne ñakare, akwa jatadita bobuta aisetẽ.

9 Mdakãre abko, kukwe ne ti bikera niere mae abko ni töbtã ie rükadre gare abko krörö: Ni jändrän kri krübäte dokwã kwã kükü, ye abko ngitio kwã kükü, bti merita takänintbe abko bã mikata. Erere arato, jändrän dokwã kwã kükü ye abko tã jrei ni kükü bã mike. **10** Akwa jrei ni kükü ye ngãtäite abko jrei niriike kākwe gobranbarera, bti nikanina ngwarbe amne tã gobrane ñakare mda. Jrei iti abko gwãngware tã gobrane amne, iti mda abko ngãmi nüke gobrane, akwa rükadi angwane

ñan gobrandre raire kwe.

11 Angwane ni jändrän kri krübäte kwrere nãmane nüne kira akwa mtare tã nüne ñakare mda, ye abko jrei ni kwãkãre abko bã mikata. Jrei ye abko kākwe sribidi ja kwrere jrei ni kükü yebe, akwa mrã Ngöbökwẽ juandi ngwarbe.

12 Angwane krotu krã jätã turi makwe ye abko jrei ni jätã ngãmi nüke gobrane, akwa niaratre rükadi gobrane angwane, kã biandi ñanã okwã kratibe ietere gobrankrã ni jändrän kri krübäte kwrere ye ben gwaire.

13 Jrei ni jätã ye abko tõi ja kwrere jökrã, aisetẽ ni jändrän kri krübäte kwrere ye ie ja di biandi kwetere, aisetẽ ni jändrän kri krübäte tö dreye, erere nuen-di kwetere krãke. **14** Angwane niaratre kākwe rüdi ni Kordero kwrere ye rüere, akwa ni Kordero kwrere ye kākwe ganaindi kwãrãbe, nitre kãrãbare Ngöbökwẽ dianinkã jakrã tã nüne janknu Jesukrã ye ben gwaire. Ni Kordero kwrere kākwe ganaindi, ñobtä ñan angwane ni Kordero kwrere ye abko tã nitre dãnkiẽ krikri dãnkiẽ amne tã gobrane nitre gobranka krikri bti arato aisetẽ.

15 Mdakãre abko, ñö bti meri bti kã ngwarbe tã takänintbe turi makwe, ye abko ni jökrã amne ni kukwe bätäkã ngwarbe blitaka amne ni kã jökrãbti temen abko turi ñö kwrere makwe. **16** Angwane krotu krã jätã turi makwe amne ni jändrän kri krübäte kwrere

turi makwe ye abko mätä rabai kri meri bti kä ngwarbe yebtä angwane, meri juandi ngwarbe amne meri mikadite kaibe bü-tiere kwe. Erere arato, meri ye ngätä kwetadi jökrä kwetre amne kroko kiakia abko kukwadi jökrä ñukwäte kwetre.

17 Dre nuendre, ie Ngöbö tö namani, erere mikani kwe nia-ratre töite, aisetse niaratre töi rabadi ja näre, käkwe ja di gobrankrä ye biandi ni jändrän kri krübäte kwrere yeye abti Ngöbökwere dre niebare, ye erere rabadi bare mäti jökrä. 18 Mda-käre abko, meri bti kä ngwarbe turi makwe ye abko nitre nü-nanka juta kri tä gobrane jrei jökräbti abko turi kore makwe ye, nieba angelekwe tie.

Ngöbökwere juta Babilonia juani ngwarbe

18 1 Yebti angele mda nämä kä käinbti jataba timonkwäre ti okwäbti. Angele ye abko bäri di kri abko jataba angwane, trä gitiaba ngwen jökrä kä nebtä, 2 käkwe ñäkäba ja dibti krörö:

!Juta kri Babilonia nikira ngwarbe!

Üai käme bätäkä ngwarbe, kräke kä nebe nete amne, nukwä bätäkä ngwarbe, ñakare dbe Ngöbö ngwärecri aibe nebe ja juda mike nete.

Erere arato, jändrän ngwarbe ngwarbe, btä ni mätä aibe kräke kä nebe nete.

3 Ngöbökwere juta ye juandi ngwarbe kore, ñobtä ñan angwane ni dröbare uba döi kwaka kisete tä ja mike ngite meri bti kä ngwarbe ben, ye kwrere ni kä jökräbti temen namani ja mike ngite nitre nünanaka juta yebe.

Angwane meri bti kä ngwarbe ben ja mika ngite, kwrere jire jrei kä jökräbti temen käkwe ja mikani ngite.

Erere arato, nitre jändrän rürümoinkä abko namani jändrän bkäne kabre jändrän bäri kuinkuin kwetre ye rürümoinbtä ütiäte ütiäte, niebare angelekwe.

4 Yebti ni mdara jire kukwei jaraba kä käinbti tie, käkwe nie-ba krörö:

Mun jen tikwe abko käkwe ñan ja mikadre ngite siba nitre nünanaka juta nete kwrere angwane, ja tare nika jatadre kri niaratre rüere arato, ye ngwane munkwe ñan ja tare nikadre arato, abkokäre mun jen tikwe ye nän mento juta ne bäre,

5 ñobtä ñan angwane kukwe käme nuenbare kwetre ye nena kabre Ngöbö ngwärecri kä käinbti angwane, kukwe kämekäme nuenta

kwetre, ye abko käinikwitekä ñakare Ngöböbti, aisetse Ngöbökwere mikadi ja tare nike jötrö.

6 Niara käkwe dre nuenbare ni mda rüere, ye kwrere nuen niara rüere arato. Niara käkwe dre nuenbare, yebti ta jändrän nuen bobu btä kukwe käme nuen dokwäre.

Erere arato, niarakwe ni mda mikani ja tare nike krübäte, ye abko ni bukata uba döi kwakate kwrere, yebti ta uba döi bäri kwaka bobu mda abko bian ie abko erere makwe mika ja tare nike bobu bti ta.

7 Mdakäre abko, niara namani bike kri amne kä namani bäri nüere kri btä nüne bäri kuin, ye kwrere arato makwe nika janknu amne makwe mika ja tare nike kri.

Meri se tä bike kri, käta töbike krörö:

Ñan meri kän kwäräi krütani, kwrere tita nete amne ñan tita ja tare nike, akwa tita takänintbe kuin nete jreina kwrere, tä nütüre jabtä.

8 Ye mdenbtä abko köbötira jire ja tare nika jatadi kri kräke abko krörö: Ni rabadi krüte kwati krübäte amne

ni kwati rabadi müen jiebtä amne

ni kwati rabadi mrö nike amne kukwadi ñukwäte arato, ñobtä ñan angwane Ngöbö ni Dänkien di kri käkwe mikadi ja ngie nuen bikabtä kri kore, aisetse rakadikä kore btä.

9 Angwane meri bti kä ngwarbe, ben ja mikata ngite bati bati, ye kwrere jire ja mikani ngite. Jrei kä jökräbti temen käkwe ja mikani ngite amne ja mikani nüere kwetre ben, ye abko juta rabadi nukwe amne ngübü rabadi tuen neen kukwä-ne ietre angwane, rabadi müaire, kä rabadi ngrente krikri be jiebtä.

10 Akwa nane mikadre ja ngie nuen arato, abtä kä jürä rabadi jrei kä jökräbti temen btäre, aisetse rabadi nünaninkä mobe temen, käkwe niedi krörö:

!Aingwaree, juta kri Babilonia juta di kri abko bobre jakän!

Ye ñobtä amarebti batibe mata ja ngie nuen jötrö dikaro ye,

niedi jreikwe.

11 Mdakäre abko, nitre jändrän rürümoinkä käkwe juta ye müaidi amne rabadi ngrente krikri be arato, ñobtä ñan angwane ni ñan rabadre mda jändrän köka-ka ietre aisetse. 12 Nitre ye abko nämane oro, plata, jä ütiäte ütiäte amne jändrän jä kwrere kädekata perla rürümoinne. Erere arato, dän ütiäte kri kädekata lino amne dän sedare amne dän bä tain drüne

amne dän tain rürümoin nämane kwetre nitre nünanka juta yete yeye. Erere arato, kri rä bāne bāne amne marfil sribebare jändrāne amne kri kuinkuin sribebare jändrān ütiāte kwrere, bronse amne jiero sribebare jändrāne amne jä kuin ütiāte kri kädekata märmol abko rürümoin nämane kwetre ietre. **13** Erere arato, canela amne jändrān rä bāne bāne mikadre ja dokwāte amne kri ngwāri rä bāne kukwadre kädekata incienso amne ñō rä bāne bāne amne kri ngwāri rä bāne kädekata mirra abko rürümoin nämane nitre nünanka juta yete yeye. Erere arato, uba dōi, kri olibo kōi amne arina kuin-kuin, trigo amne nbi, obeja, mdä, kareta jākādre mdāye amne ni klabore, ni ye abko ni ütiāte Ngōbōkrä, akwa rürümoin nämane jändrān mda mda kwrere nitre jändrān rürümoinkākwe.

14 Ni ye kākwe niedi krörō juta yebtā: iKri ngwākā kuin amne jändrān jōkrä mda mda nämane nebe bānānte mun kada-te, ye abko ñakare mda makwe! iJändrān kabre makwe, bti mata nūne bā nuāre, ye abko nikanina ngwarbe jōkrä makān! niedi kwetre. **15** Nitre jändrān rürümoinkā nämane jändrān rürümoinne juta yete abko kōböire namani jändrān bkāne kabre, niaratre ye abko btā kā jürä rabadi, aisete rabadi nūnaninkā mobe temen, kā rabadi müen amne rabadi ngrente krikri be juta ye jiebtī. **16** Angwane raba-di niere krörō:

iAingwaree juta kri, ma bobre jakān!
Dän ütiāte kri kädekata lino, ye ma nämane kite jabtā.

Erere arato, dän bā mikibare amne dän bā tain drūne, bti ma nämane ja dātere.
Erere arato, oro amne jä tuāre mda mda ütiāte ütiāte amne perla, bti ma nämane ja dātere.

17 Angwane batibe jändrān kabre ye nikira ngwarbe jōtrō makān, abko rabadi niere.

Mdakāre abko, nitre ru ngwianka amne nitre nānkā rute mrenbti amne ni mda mda ru ngwianka mrenbti abko rabadi mobe temen juta mike ñārāre arato. **18** Angwane juta ye raba-di nukwe abko ngübū jatadi ietre, abtā rabadi ngrente krörō: Juta ütiāte kri ne kwrere tua ñakare jire abko rabadi niere. **19** Rabadi ulire abko bā mikakrä niaratre kākwe dobro mnū kitadi ja dokwābti amne rabadi müen amne ngrente krikri be, kā raba-di ñāke ja dibti krörō:

iAingwaree juta kri, ma bobre jakān!

Nitre nünanka ma kanti abko jändrān bkāne kabre, ye kōböire nun ru ngwianka mrenbti namani jändrān bkāne kabre arato, akwa batibe Ngōbōkwe ma junina ngwarbe jōkrä,

rabadi niere.

20 Yebti angele ye abko kākwe nieba mda:

Juta niki ngwarbe se abko kā ngwen nuāre jabtā munkwe kā käinbti yete.

Amne mun juta deme Ngōbōkwe ye kākwe kā ngwian nuāre jabtā.

Erere arato, mun kukwe kuin Jesubtā ngwianka amne mun Ngōbō kukwei niekā ye kākwe kā ngwian nuāre jabtā, ñobtā ñan angwane Ngōbōkwe juta juni ngwarbe, ye abko mun dokwāre juni ngwarbe kwe, aisete munkwe käi ngwian nuāre jabtā, nieba angelekwe.

21 Yebti angele dite kri kākwe jākwa kri bāsi krü kri trigo ukwakrä kwrere jire dianba kiset, bti kitaba kwe mrente, kākwe nieba krörō:

Jākwa kri kiti mrente, se kwrere makwe juta kri Babilonia juandi ngwarbe amne ni mda mda kākwe ñan ma tuadreta jire mda.

22 Mdakāre abko, arpa, tolero amne drü, ye abko ñan kukwei nuadi jire chi mda ma käite yete.

Erere arato, krü trigo ukwakrä ñan ngō nuadre jire chi mda yete.

23 Erere arato, ñotra trā ñan tuadreta jire chi kwati yete amne, ni ja mikaka

gure käi ngwianta nuāre jabtā yete, ye kwrere käi ñan ngwianre nuāre jabtā mda yete, ñobtā ñan angwane nitre jändrān rürümoinkā yete abko namani jändrān bkāne kabre kabre abti namani dite dite.

Erere arato, nitre nünanka juta yete kākwe ni kā keta kabre te ngōkani kwrasihti, abtā ja ngie nuadi kore kwe.

24 Juta yete nitre Ngōbō kukwei niekā abko kāmikani.

Erere arato, nitre deme Ngōbōkwe kāmikani amne ni kā jōkrābti temen tödekaka Ngōbōbti abko kāmikani juta yete, aisete Ngōbōkwe mikadi ja ngie nuen kore,

nieba angelekwe juta Babilonia-btā.

Aleluya niebare kā käinbti Ngōböye

19 1 Yebti ni kwati kukwei rababa ruen ja dibti tie, kā rababa niere krörō kā käinbti: iAleluya! Ngōbö nikwe aibe ni dantarikā, aibe ütiāte kri amne di kri.

2 Ye ñobtā ñan angwane meri bti kā ngwarbe tā ni brare näkwite, ye kwrere jire juta ne nämane ni kwati näkwite kukwe kāmekāme jiebtī kā jōkrābti temen abko

kräke Ngöbö tā kukwe
ükete kuin era metre.
Amne nitre deme
Ngöbökwē kāmikani
nitre nūnanka juta
yetekwe, ye dokwäre
abko Ngöbökwē mirira ja
ngie nuen krübäte.

3 Yebti nieba krörö mda
kwetre:

iAleluya! Juta ne ngübüe
rabadi kärekäre
kukwäne, ñobtä ñan
angwane rabadi nukwe
kärekäre aisete.

4 Angwane nitre umbre unbre
ni gre bti nibkä amne jändrän
kräbkä nämāne nūne ye rababa
ja okokrä mike nebe dobobtä
temen, kākwe Ngöbö nämā tākā-
nintbe kürä gobrankrābti ye
mike ütiäte jae abko rababa nie-
re krörö: iAmen! iAleluya! raba-
ba niere.

5 Ye btäräbe kürä gobrankrä
Ngöbökwē kanti ni kukwei raba-
ba, kākwe nieba krörö:

iNgöbö nikwe ye käikitekä
munkwe!

iMun ütiäte kri amne mun
bobre kätä sribire
Ngöbökrä, kätä Ngöbö
mike ütiäte jae, ye kākwe
Ngöbö nikwe käikitaka!
rababa niere.

6 Yebti ni kwati kukwei raba-
ba ruen tie bäsi ñöta neme
betekä jäkwatabtä timon ngöta
neme kri, ye kwrere jire ni
kukwei rababa ruen tie amne,
bäsi unsuni ngö kri, ye kwrere
ni kukwei rababa ruen tie, kä
rababa niere:

iAleluya!

iNgöbö ni Dänkien Di Kri
Jändrän Jökrä Nuenkrä
kitera gobrane!

rababa niere.

7-8 Ni Kordero kwrere kitera
ja mike gure amne meri
bati abko kākwe ja
dätenirira rabakäre ben
abko ie dän kuin lino trä
ngitiekä bini kitakrä
jabtä ja mikakäre gure.
Ne aisete ari kä ngwen
nuäre jabtä amne ari kä
ngwen juto jabtä amne
ari niara käikitekä.
Nitre deme jen Ngöbökwē
kākwe sribi kuin era
metre nuenbare
Ngöbökrä.

Sribi kuin era metre, ye
abko dän kuin lino abko
bä mikata kore.

9 Yebti angelekwe nieba mda
tie:

Kukwe tike krörö täräbtä: Ni
Kordero kwrere kākwe ja miri
gure, ye kanti nire nire tā nūbai-
bare, ye abko btä kä raba nuäre
kri krübäte, nieba kwe tie.

Abti jötrö nieba krörö mda
kwe:

Tikwe kukwe nini, ye abko
Ngöbö Kukwei era metre, erere
tikwe nini mae, nieba kwe tie.

10 Angwane ti rikaba ngitiekä
ngukudokwäbti temen angele ye
ngotobtä mikakäre ütiäte jae,
akwa angele ye kākwe nieba tie:

Ma amne ma mräkä mda
mda kätä nūnenkä dite jabtä
kukwe era metre Jesukwe btä,
kätä sribire Jesukrä, ye kwrere

tita sribire arato, aisete makwe
Ngöbö aibe mika ütiäte jae,
ñobtä ñan angwane nitre Ngöbö
kukwei niekä era metre, ye
mden abko nämāne blite Jesu-
btä, nieba angelekwe tie.

Jesu jatani mdä bä ngwenbti

11 Angwane kä käinbti gitiaba
sete, rababa tuen tie amne mdä
bä ngwen nämā krati. Mdä yebti
ni nämā näin iti abko kädian
nämā Ni Ja Kukwei Mikaka Täte
amne Ni Era Metre. Niara nämā
kukwe ükete metre ta ni jökrä
kräke amne kukwe era metre
dokwäre nämā rüre Ngöbö rüe-
be. **12** Angwane niara okwä abko
rababa tuen trä ngitiekä ñukwä
jutra kwrere tie jändrän jökrä
gare ie bä mikakrä amne, dokwä-
bti abko korona nämā kabre
kabre, niara abko gobran kri bä
mikakrä amne, niara kä nämā
tikani mda ye abko niara aibe ie
nämā gare kaibe. **13** Mdakäre
abko, dän jükani därire jökrä
nämā kitani jabtä kwe niara krü-
tani ni dantarikäre bä mikakrä
amne, niara kädian nämā Ngöbö
Kukwei arato. **14** Niara ye jiebti
abko nitre rükä kä käinbti nämā
näin kwati krübäte abko dän
ngwen lino nämā kitani jabtä.
Dän lino ye abko ütiäte amne
merebe amne, niaratre nämā
näin mdä ngwen ngwenbti.

15 Niara rababa ñäke angwane,
bäsi ngitra tu grine jabtä kwäri-
kwäri, ye kwrere jire kukwe
rababa betekä kadate nitre kä
jökräbti temen nūnanka Ngöbö
rüere kāmikakäre. Erere arato,

“mökän jierore ni kāmikakäre,
bti niarakwe gobrandi tare,”
amne bäsi uba tükakata ngotobti
amne ñöi aibe diankata, ye kwrere
jire niarakwe rätädi Ngöbö
rüebti, yebti abko Ngöbö Di Kri
Jändrän Jökrä Nuenkrä, Ngöbö
ye abko mätä kri krübäte abko
bä mikata kore kwe. **16** Dänbtä
ie amne uliebtä abko niara kä
nämā tikani mda abko krörö:
JREI BÄRI KRI JREI MDA MDA KRÄKE
AMNE DÄNKIEN BÄRI KRI DÄNKIEN
MDA MDA KRÄKE abko nämā tikani
kore btä.

17 Yebti ti okwä rababa ange-
lebtä angwane, angele ye rababa
nūnaninkä ñänänbti angwane,
nukwä jökrä ngri kwetakakweta-
ka jüden kwrere tā nikenkä käin-
ta, ie angele ye rababa ñäke kri-
kri ja dibti krörö mda: Ngöbö
kite mrö sribere kri krübäte mun
bukakrä, aisete mun jakwe ja
ükekrö jökrä mröre. **18** Angwane
munkwe jrei ngrie kwetadre,
munkwe nitre rükä dänkien
ngrie kwetadre, munkwe nitre
rükä baliente baliente ngrie kwe-
tadre, munkwe mdä rükä ngrie
kwetadre, munkwe nitre nänkä
mdäbti rübtä ngrie kwetadre.
Erere arato, munkwe ni jökrä
ngrie kwetadre abko ni ñakare
klabore, ni klabore, ni bobre
amne ni ütiäte kri ngrie kweta-
dre munkwe, aisete jakwe, nieba
angelekwe nukwäye.

19 Angwane ni jändrän kri
krübäte kwrere ye kākwe rükä
kwekwe amne jrei kä jökräbti
mikabara biare rükäre ni nänkä
mdä ngwenbti ye rüre amne

rükä kwekwe rüere arato. Nikani rüere, **20** akwa ni jändrän kri krübäte kwrere ye kaba ngite amne ni ngöbö ngwarbe ngwarbe kukwei niekä kākwe sribi kri ñan tuabare nuenbare abko kaba ngite arato. Ni ngöbö ngwarbe kukwei niekä kākwe sribi kri ñan tuabare nuenbare, yebti abko ni kwati ngökani kwe amne, nitre yebtä abko ni jändrän kri krübäte kwrere ye kaba tikani. Erere arato, ni jändrän kri krübäte abko bā sribebare ngöbö ngwarbere abko mikani ütiäte kwetre, yebtä abko ni jändrän kri krübäte kwrere btā ni ngöbö ngwarbe kukwei niekä kaba ngite, ye abko ñukwā jutra ngitiekä asufrebe, ye te kitaba nire jökrä ja tare nikakäre. **21** Angwane ni mda mda nämane rüere Jesukristo rüere abko Jesukristo nämā näin mdäbti ye kākwe kāmikaba jökrä ja kukwei aibebti, ñobtä ñan angwane niara kukwei abko rababa betekä ngitra tu kwrere, aiseite ni kāmikaba jökrä kwe. Angwane nukwā ngri kwetaka-kwetaka jüden kwrere kākwe nitre ye ngrie kwetaba trinetrine jökrä.

Kä mili krati

20 **1** Yebti angele nämā iti kääinbti, jataba timonkwäre ti okwäbti. Angele ye abko nämā näin llabe jukwe Kä Timonbti ngwena kisete amne kadena kri ngwian nämā kisete kwe arato. **2** Angele ye abko kākwe mökata kaba ngite. Mökata ye abko tbi nämāne kira,

arabe abko kädianta Diablu amne Satana arato. Mökata ye abko angelekwe mäkäteba kade-nanbti kää mili krati, **3** kākwe kitaba ngite Kä Timonbti, bti jukwe dikaba kuin bti kwe, bti Ngöbö kää tikani jukwebtä, ni mdakwe ñan tikadre abkokäre. Niara ñan rikadreta nitre ngökö-ta kää jökräbti temen, abkokäre kää mili krati ngämi niken ta niara ñan tikaditeta. Akwa yebti mökata ye tikaditeta bā jötrö.

4 Yebti kürä gobrankrä nämā kabre kää kääinbti btā ti okwä rababa. Kürä yebti abko nitre ie ja di biani Ngöbökwē kukwe ükatekäre nikrä abko nämā tākā-nintbe, tikwe tuaba. Erere arato, nitre kākwe ja tare nikani blita-btä Jesubtä amne kukwe kuin Ngöbökwē Jesubtä mikäbtä gare ni mda mdaye, akwa nünankabare dite jabtä kwetre, kākwe Jesu rükaninte ñakare abko dokwäre dokwä tikaninkä, ye abko üai nämā siba yete. Mdakäre abko nitre ye kākwe ni jändrän kri krübäte kwrere ye mikani ñakare ngöböre jae amne niara bā mikani ñakare ütiäte jae ngöbö kwere. Erere arato, nitre ye okobtä o kisebtä abko ni jändrän kri krübäte kwrere ye kää tikani ñakare abko üai tuaba tikwe. Niaratre ye abko rükabata nire jökrä, kākwe gobranba kää mili krati Kristobe gwaire tikwe tuaba. **5** Ni ruäre mikabata nire käne kore Ngöbökwē, akwa ni mda mda abko mikadita nire ñakare kwe abti kää rikaba mili krati ta. **6** Nitre rükabata nire kore, ye

abko deme amne ni yebtä kää rabadi nuäre kri. Niaratre ñan krütadre mda, ye abko Ngöbökwē ñan mikadi ja ngie nuen akwa, nünandi kärekwäre kwetre Ngöböbe angwane, ni blitaka Ngöböbe ni mda mda diäre tää sribire, ye kwrere sribidi kwetre Ngöbökrä amne Kristokrä amne gobrandi kää mili krati kwetre ben gwaire arato.

Ngöbökwē Satana juani ngwarbe mrä

7 Yebti kää mili krati rikadi ta angwane, Satana tää ngite Kä Timonbti abko tikadite angwane, **8** näin ni ngökö kää jökräbti temen nebebe kää ñäre jökrä amne kākä Gog amne Magog angwane, ni ükadikrö kwati kwe rükäre Ngöbö rüere. Ye abko, mren ümain kwrere jire ni rabadi ja ükaninkrö rükäre Ngöbö rüere. **9** Angwane nitre rükä kwati ye rikaba mobe kākwe ja ükäröba jökrä jutra deme Ngöbökwē bäre temen amne jutra Jerusaleñ tarebare Ngöbökwē ye bäre temen, ni ye juankäre ngwarbe, akwa batibe ñukwä kää kääinbti jataba timonkwäre kākwe ganinkä jökrä se kwrere. **10** Angwane diablu nämāne niaratre ngökö, ye abko ñukwä jutra ngitiekä asufrebe mni mni te kitaba. Kää ye arabe käänti ni jändrän kri krübäte kwrere kitanina käne amne ni ngöbö ngwarbe kukwei niekä kitanina arato, ye käänti diablu kitaba. Kää ye käänti mikadi ja tare nike kärekwäre dibire rare.

Ngöbökwē kukwe ükaninte ni krütanikrütani kräke

11 Yebti kürä gobrankrä kri, ngwen bürere tuaba mda tikwe. Kürä yebti abko ni nämā tākā-nintbe iti. Niara ngwärekwä abko kää temen ne amne kää käänta se gitaba batibe jökrä abko ñan tuaba jire chi mda tikwe. **12-13** Angwane nitre müre neketani mrente, ye erere nükaninta nire jökrä. Erere arato, ni müre ketaniketani abko üai nämāne kää nakebtä, ye erere nükaninta nire jökrä arato, aiseite nitre ütiäte krikri ya, o bobre bobre ya, krütanikrütani abko nämā nünaninkä jökrä kürä gobrankrä Ngöbökwē ye ngwärekwä, btā ti okwä rababa. Ye btäräbe tärä metateba keteti. Erere arato, tärä ni nünanka kärekwäre Ngöböbe mikakrä gare abko metateba arato. Angwane ni itire itire ngämi krüte, käänenkri dre dre nuenbare kwetre, ye erere btä Ngöbökwē kukwe ükateba kräke, aiseite ni itire itire kākwe dre dre nuenbare nämā tikani täräbtä, ye erere kukwe ükateba kräke Ngöbökwē. **14** Yebti gata ara amne kää nakebtä kitaba ñukwä jutrate kää Timonbti juankäre ngwarbe. Nukwä jutra kää Timonbti ne käänti abko nita krüte bobukäre. **15** Tärä ni nünanka kärekwäre Ngöböbe mikakrä gare, tärä yebtä nire nire kää kwani ñakare, ye erere kitani jökrä ñukwä jutrate ja tare nikakäre kärekwäre.

Juta Jerusalén btin

21 1 Yebti kā kāinta btin amne kā temen ne btin tikwe tuaba mda, ñobtä ñan angwane kā kāiñita se btä kā temen ne amne mren dātebare kāne Ngöbökwe abko nikanina ta, aisete ñan rababa jire mda. 2 Yebti juta Jerusalén btin kuin deme nāma Ngöbö kanti kā kainti abko jataba timonkwäre tikwe tuaba bāsi meri tā ja ūkaninte kuin bā nuäre brare ngābti ja mikakäre gure ben, ye kwrere jire juta ye rababa tuen tie. 3 Angwane btäräbe kürä gobrankrä Ngöbökwe tuaba tikwe, ye kanti ni kukwei jaraba kri tie, kā rababa niere krörö:

Mtare Ngöböta nūne ni jen kwe ben juta btin nete. Ngöbö-kwe nūnandi bentre amne niaratre rabadi juta jen Ngöbökwe, aisete Ngöbö ara jire tādi bentre Ngöbö jen kwetre kwrere. 4 Angwane Ngöbökwe niaratre okwä ñoi sökādite jökrä ietre amne ni ñan krütadre jire iti mda amne ñan ja müaidre jire chí mda amne ñan ja müaidre ja tare nikabtä, ñobtä ñan angwane kukwe nāmane ūkaninte ño kānekāne, erere nikanina jökrä ta. 5 Angwane Ngöbö nāma tākänintbe kürä gobrankräbti ye kākwe nieba krörö:

Jändrän jökrä tita sribereta btin, nieba kwe.

Bti niebata kwe tie:

Kukwe ne abko kukwe era metre, abtä ni jökrä rabadre

tödeke bti, aisete tike täräbtä, nieba kwe tie.

6 Yebti Ngöbökwe nieba krörö tie:

Jändrän jökrä nibira bare. Ti abko tärä okwä kena kādianta alfa amne tärä okwä mrä kādianta omega kwrere. Ti nāmanena jändrän jökrä kānenkri kena amne ti rabadi jändrän jökrä tābti mrä. Mdakäre abko, nire nire ie tomna ye abko ie tikwe ñö okwä kuin nire kāta ni mike nūne käre-käre ye biandi ngwarbe tomnane. 7 Mdakäre abko, nire nire kākwe ja tare nikadre tödekabtä tibti, kākwe ti rükandrete ñakäre abko ni rüe ganainkā kwrere abko ie tikwe jändrän kuinkuin jökrä ne biandi amne, ti rabadi Ngöböre kwetre amne niara rabadi ti ngäbriänkä tikwe. 8 Akwa ni kāta ja ngwen ngwarbe amne ni tödeke ñakäre Jesu-bti, akwa tā niara rükente, amne ni ñan tö Ngöbö Kukwei mikai era jae, erere arato ni ngututu diän diän, ni ni mda mda kāmikaka amne ni ja mikaka gure tiebetiebe amne ni kwrarekwäre, amne ni sukiare sukiare, amne ni jändrän ngwarbe mikaka ngöböre jae amne ni ni ngökaka, ye abko ñukwä jutra ngitiekä asufrebe mni mni abko te kitadi. Ye kanti krütadi bobukäre. 9 Yebti angele ni kükü kisete blato nāma abko te Ngöbö mätä kri nāma iandrete, angele ye abko jataba iti, kākwe nieba mda tie:

Meri ben ni Kordero kwrere rabai, meri ye abko ti bike mike

tuare mac. Jakwe tuen, nieba kwe tie.

10 Yebti Ngöbö Ūaikwe ti mikani jändrän tuen köböre kwrere angwane, ngitio kri mobe kainti, kanti angele rikaba ti ngwena, kākwe juta Jerusalén deme nāma kā kainti Ngöbö kanti abko jataba timonkwäre, tikwe tuaba. 11 Juta ye abko Ngöbö trā bā nuäre abko bti rababa trā ngitiekä amne bāsi jä tuäre ütiäte kri kädekata jaspe, kwrere jire juta ye rababa trā ngitiekä. 12 Angwane juta ye bäre temen abko ki nāma mikani kri amne mobe kainti. Ki yebtä abko jukwe nāma kwä jätäbti kubu amne jukwe kwatirekwatire btä angele nāma nūnaninkä iti ngibiare. Erere arato, Jacob ngäbriänkä ni jätäbti nibu abko kā nāma tikani itire itire jukwe kwatirekwatire btä. 13 Jukwe ye abko nāma kwä jätäbti kubu: komä kā dririkri, komä ngwitäräkri, komä mötarikri amne komä nindrinikri. 14 Amne ki mikani jutabti, ye abko jä nāma mikani kwä jätäbti kubu gräre. Jä yebtä abko nitre Jesu kukwei ngwianka ni jätäbti nibu kā nāma tikani.

15 Angwane angele nāma blite tibe ye nāma nöra orore ngwena krati kisete juta ñākäkrä, jukwe ñākäkrä amne ki jutabti ñākäkrä arato. 16 Juta ye abko ja näre jökrä kwärikwäri, aisete körä ja näre kwärikwäri. Angele kwe juta ye ñākäba nöra yebti angwane, rababa 2,200 kilometro ja näre körä ngakri, kwatakri

amne kukwäne rababa ja näre jökrä. 17 Yebti ki nāma jutabti, ye ñākäba kwe arato angwane, ki ye abko rababa 65 metro ie, ye abko ni kā nebtä tā jändrän ñäke ño, ye kwrere angele nāma juta ye ñäke. 18 Amne ki nāma mikani juta yebti abko jä kuin ütiäte kri kädekata jaspe nāma mikani kire, akwa juta ara jire abko oro kuin trā ngitiekä bidrio kwrere. 19 Angwane jä kwä jätäbti kubu mikani ki gräre abko btä jä tuäretuäre ütiäte kri bätäkä ngwarbe nāma mikani abko krörö: jä kane btä abko jä kuin ütiäte kri kädekata jaspe nāma mikani, jä kubukäre abko btä jä kädekata zafiro nāma mikani, jä komäkäre abko btä jä kädekata ágata nāma mikani, jä kobkäkäre abko btä jä kädekata esmeralda nāma mikani amne 20 jä kwärikäkäre abko btä jä kädekata ónice nāma mikani, jä kwä tikäre abko btä jä kädekata cornalina nāma mikani, jä kwä kükükäre abko btä jä kädekata crisólito nāma mikani, jä kwä kwäkäre abko btä jä kädekata berilo nāma mikani amne jä kwä ökänkäre abko btä jä kädekata topacio nāma mikani, jä kwä jätäkäre abko btä jä kädekata crisopraso nāma mikani amne jä kwä jätäbti kwatikäre abko btä jä kädekata jacinto nāma mikani amne jä kwä jätäbti kubukäre abko btä jä kädekata amatista nāma mikani.

21 Angwane jukwe kwä jätäbti kubu juta yebtä abko perla aibe mikani jukwere, aisete

jukwe kwatirekwatire abko perla kwatibe nāma mikani jukwere amne ji juta ye ngātāite ta abko oro kuin ara jire mikani jire amne nāma trā ngitiekā bidrio kwrere jire abko tikwe tuaba.

22 Mdakāre abko, ju blitakrā Ngōbōbe tikwe tuaba ñakare juta Jerusalén btin yete, ñobtä ñan angwane ni Dānkien Ngōbō Di Kri Jāndrān Jōkrā Nuenkrā abko tā yete amne ni Kordero kwrere tā yete abko ben ni raba blite gwārere, aise te ju blitakrā Ngōbōbe ñakare yete. **23** Erere arato, ñānā amne sō trā rabadre juta yete abko ñakare ūtiāte, ñobtä ñan angwane Ngōbō trā kuin bā nuāre ye abko tādi juta yete amne ni Kordero kwrere abko tā ñotrare yete arato. **24** Ye abko nitre nūnanka kā jōkrābti temen abko kākwe dikadikā ñotra ye trāte nebebe juta Jerusalén btin ye kanti amne nitre jreire kā jōkrābti temen abko kākwe jāndrān ūtiāte kwekwe biandi Ngōbōye niara mikakāre ūtiāte jae juta yete. **25** Angwane jukwe juta yete abko ñan dikadre jire chi rare amne juta ye kanti kā ñan rabadre iko arato, aise te jukwe ñan dikadre jire chi.

26 Erere arato, nitre nūnanka kā jōkrābti temen abko jatadi jāndrān ūtiāte ūtiāte kwekwe ngwena biandre Ngōbōye niara mikakāre ūtiāte jae juta yete.

27 Akwa jāndrān kāmekāme ñan rikadi jire chi nebe juta yete amne, ni diān diān amne ni ni ngōkaka ñan rikadi jire chi yete arato; akwa nire nire kākwe

nūnandre kākēkäre Ngōbōbe abko kätä tikani tārā ni Kordero kwrere yebtä, ni ye aibe abko rikadi nūne juta yete abko angelekwe mikani tuare tie.

Ñö kri ni mikakrā nire kākēkäre

22 1 Yebti ñö kri kuin dirare angelekwe mikaba tuare tie. Ñö ye abko ni mikakrā nūne kākēkäre amne ñö ye abko kuin merebe jā cristal bā merebe ye kwrere. Erere arato, kūrā gobrankrā Ngōbōkwe amne kūrā gobrankrā ni Kordero kwrere kwe, ye kanti ñö ye nāma neen.

2 Angwane ji kri juta yete abko ōtōbu ta ñö ye tā neen amne kri ni mikakrā nūne kākēkäre nāma niren ñobtä kwārikwāri. Kri ye abko ngwā nāma nebe sō kratirekratire, aise te kri ye ngwā nāma nebe bā jātābti bobu btā kā kwatirekwatire amne kri ye abko kā nāma ni jōkrā mikakrā kuinta. **3** Mdakāre abko, juta Jerusalén btin yete abko jāndrān btā ngūrūn mikani Ngōbōkwe abko ñan rabadi jire chi. Angwane kūrā gobrankrā Ngōbōkwe amne kūrā gobrankrā ni Kordero kwrerekwe abko tādi juta yete, aise te nitre sribikā kwekwe abko erere kākwe niaratre kākēkäre.

4 Angwane niaratre jōkrā kākwe ja tuadi gwārere Ngōbōbe, kā nāin niaratre kā ngwena tikani ja okobtä, niaratre abko ni jen Ngōbōkwe bā mikakrā. **5** Juta yete abko kā ñan rabadre iko jire chi, aise te nitre nūnanka juta yete, krāke ñotra ñan rabadre ūtiāte.

Erere arato, ñānā trā ñan rabadre ūtiāte krāke, ñobtä ñan angwane Ngōbō ni Dānkien ara jire kākwe kā trā biandi nitre nūnanka yete ie. Niaratre kākwe gobrandi kākēkäre.

6 Yebti angelekwe nieba mda tie:

Kukwe nieta tikwe mae, ne abko era amne kukwe kuin tōdekakrā. Ye abko, ni Dānkien Ngōbō ara jire kätä nitre niara kukwei niekā tōi tike ja kukwei niere, Ngōbō ye ara kākwe angele kwe juani abko kukwe mden mden rakadikā bā jōtrō mikakāre tuare sribikā kwekwe ie, nieba kwe tie.

Jesu jatadita

7 Angwane ni Dānkien Jesu abko kākwe nieba mda tie:

!Ti rükadita jōtrō! Kukwe biani Ngōbōkwe nitre Ngōbō kukwei niekā kōbōire tā tikani tārā nebtā, ye nire nire tā mike era jae, yebtä abko kā rabadi nuāre amne Ngōbōkwe ja di biandi ie, nieba kwe tie.

8 Angwane ti Juan, ti ne abko kākwe kukwe ne tuaba amne tikwe kukwe nuaba arato. Tikwe kukwe tuaba amne tikwe kukwe nuaba ünān jōkrā, ye btārābe angele kākwe kukwe mikaba tuare tie, ye ngotobtä ti rikabi ngitiekā ngukudokwābti temen mikakāre ūtiāte jae. **9** Akwa angele ye kākwe nieba mda tie:

Ma mrākā mda mda kätä kukwe tā tikani tārā nebtā mikaka tāte ye kätä sribire Ngōbōkrā, ye kwrere tita sribire arato, aise te makwe ñan ti mika ūtiāte jae,

akwa Ngōbō aibe makwe mika ūtiāte jae, nieba kwe tie.

10 Erere arato, angelekwe nieba krōrō mda tie:

Ngōbō Kukwei biani niedre mae abko tā tikani tārā nebtā, ye abko kebera nebe bare, aise te makwe ñan ūka kaibe tiebe, akwa makwe mika gare ni mda mdaye. **11** Angwane kā kitera neme braibe ja tōi kwitakrā nie, aise te nire nire kätä kukwe kāmekāme nuene Ngōbō rüere, ye tuametre nuene janknu amne, nire nire kätä kukwe diān diān nuene, ye tuametre nuene janknu; akwa nire nire kätä jāndrān kuinkuin nuene ye kākwe jāndrān kuin nuen janknu Ngōbōkrā. Erere arato, nire nire kätä nūne deme amne metre, ye kākwe nūna deme janknu Ngōbōkrā, nieba angelekwe tie.

12 Angwane ni Dānkien Jesu-kristo kākwe niebata tie:

!Ti rükadita jōtrō! Akwa ni itire itire tā dre dre nuene, ye abko ti jatadi ūtiā ngwena krāke amne, **13** ti abko tārā okwā kena kādianta alfa amne tārā okwā mrā kādianta omega. Ti nāmanena jāndrān jōkrā kānen-kri kena amne ti rabadi jāndrān jōkrā tābti mrā.

14 Mdakāre abko, dān bātāteta tā nebe ngwen būrere, ye kwrere nire nire kākwe tōdekadre tibti rabakāre merebe Ngōbō ngwāre-kri abko rabadi nebe kri ni mikakrā nūne kākēkäre kanti amne juta Jerusalén btin, ye kanti rabadi niken amne ni ye abko btā kā

rabadi nuäre. **15** Akwa ni ngututu diän diän, ni kwrarekwrare, ni sukiare sukiare, ni ja mikaka gure bati bati, ni ni mda mda kämika-ka, ni jändrän ngwarbe mikaka ngöböre jae amne ni jökrä käta ni ngöka tarere amne tä käi ngwen nuäre jabtä ni ngökakäre, nitre korekore abko rabadi jökrä Ngöbö okwä bäre mento.

16 Ti Jesu, ti ne mden käkwe angele tikwe juani kukwe ne mike gare jökrä mae abko erere makwe mikadre gare nitre gätäkä ti käfti yeye. Ti abko Jrei David bkün amne ti abko Muke Trä Dirare Dekä kwrere, nieba Jesukwe tie.

17 Ye abko, Ngöbö Üai Deme amne ni Kordero kwrere nän muko käta iJakwe! niere Jesuye amne, nire nire tä ti kukwei nuen käkwe iJakwe! nie Jesuye arato. Mdakäre abko, nire nire ie tomna abko tö tomna ñain nünakäre käre-käre, ye abko jata Jesuye, käkwe ñö ni mikakrä nüne käre-käre ye ña ngwarbe tomnane.

18 Angwane Ngöbö Kukwei niebare tä tikani tä rä nebtä, ye

nire nire tä kukwe nuen ye abko ie ti bike niere krörö: Kukwe tä tikani tä rä nebtä, nebti ta nire nire käkwe kukwe mdara jire tikadi, ye dokwäre abko kukwe taretare tä tikani tä rä nebtä abko bti Ngöbö-kwe mikadi ja tare nike kri krübäte. **19** Angwane kukwe tä tikani tä rä nebtä, ne nire nire käkwe diandrekä ruäre, yebtä abko kri ni mikakrä nüne käre-käre, ye Ngöbö-kwe diandikä kän amne kri ye ngwäkä ñan kwetadre kwe, aise te ñan nünandi käre-käre kwe Ngöböbe. Erere arato, juta deme Jerusalén ye Ngöbö-kwe diandikä kän, aise te ñan nünandi kwe yete.

20 Ti Jesu käta kukwe tikani tä rä nebtä niere metre, käta niere krörö: iTi näinta jötrö kä temenbtä! abko tita niere.

Ti Juan, ti ne abko käta niere krörö ni Dänkien Jesuye: iAmen! iJakweta ti Dänkien Jesu! tita niere Jesuye.

21 Ni Dänkien Jesu käkwe ja moto mika kuin ni jen Ngöbö-kwe kräke abko ie ti tö. Amen. Abko kore se. Ne ngörä.